

本朝分省人物考

人物考卷之一百目錄

山西平陽府

藺芳

王翰

石撰

暴昭

李祐

蔡瑄

辛彥博

衛子剛

袁泰

陳琦

薛禎

史誠祖

周麟

郭睿

張福

劉元貞

史善

王約

張琦

陶銓

柴良

邢讓

衛英

李杲

劉琰

王衡

張璠

暢享

李嘉

薛瑄

韓文

李進

韓重

史英

陶琰

李瀚

李浩

文皓

王文

張翰

吳珉

陳攷

王泰

楊謙

郭韶

劉夔

馬騷

張潤

成文

史魯

楊守禮

趙載

陶滋

景濤

亢良玉

陳韜

許翔鳳

劉憲

劉  
紳

楊  
瞻

崔吉

王珂

喬瑞

李錦

陳希良

張鵬

楊博

王與齡

梁格

裴紳

劉廷臣

王崇古

楊俊民

張四維

晉應槐

賈應元

張夢鯉

邵光先

王家屏

趙三聘

衛瑛

補遺

王矩

劉翀

王佐

本朝京省人物考卷之一百

山西平陽府

藺芳

藺芳山西夏縣人倜儻濶達有大節讀書通今古重義薄利不以富貴貧賤動其心洪武中舉孝廉授刑部員外郎陞郎中上卽位陞吉安知府先是金華朱仲智爲吉安知府寬厚廉潔剋革吏弊禮賢愛民民甚戴之會被召改重慶知府民思慕之而難其繼者已而芳至寬厚持大體而明習吏事庭無滯牘民有告訐者數語立決吏無所容其姦芳以愛民爲心

而處事曲當民更大喜吉水有無賴民詣闕言縣故  
有銀冶烹煉可獲厚利朝廷遣官以其人覆視既至  
父老羣訴於芳曰卽用無賴言吾屬父子兄弟不能  
保而邑有無窮之患矣芳曰銀冶誠有之乎曰無之  
但聞故老云宋季時邑有姦民妄言銀冶於朝者後  
坐誣罔之罪今芒芒山谷上者樹松栢下者藝禾稼  
豈嘗見有所謂銀冶太守如疑我言詣闕告者在此  
請指說銀冶之處我等甘罪芳惻然顧告者而問之  
噤不能對父老趣之對卒無對父老又言此無賴人  
平日所爲罪惡累累皆應死其人在傍聞之惴慄芳



曰母恐罪皆赦前今獨問汝銀治有無耳告者卽叩  
頭告實言我愚昧人而居鄉素貧誠不甘本鄉之人  
皆華衣美食揚揚未嘗齒我也妄意禍之以至如此  
死罪死罪惟太守吾父母何以生之芳爲草奏大意  
謂告者嘗聞故老言宋時說銀治事而未及詳輒率  
意上陳今詢邑人長老皆云率未嘗有銀治卽不實  
甘受鈇鑕言人人同謹以實聞同官或不肯署曰朝  
廷治銀治吾輩敢方命耶奏入如不信胥受罪矣芳  
曰吾輩奉命守此土非以爲民乎今  聖天子仁明  
在上如天日諸公乃不以直道効臣節耶有罪芳請

獨任卽自署奏同官不得已亦強署焉 上得奏曰  
吾固意愚民之妄也遂罷其事然以告出於率意也  
亦不之罪芳自奉儉約日嘗蔬食被服無統綺事奉  
母極孝母亦善教凡芳晝所行事夕則命陳於前有  
未善必讓之芳謹受教不違後爲工部都水司主事  
督浚治河南河渠凡所經郡縣民情吏治有未便者  
輒疏以聞陞本部右侍郎以疾卒吉安自芳去其民  
思慕賢守必曰朱蘭朱蘭云

王 翰

王翰夏縣人洪武初以明經薦除本縣學訓導歷河

南鄆陵縣學教諭永樂初周王保陞本府教授入爲翰林編修後調廉州府學倭寇攻城翰率生徒抗敵冒刃而死所著有敝帚集梁園寓藁子礪永樂乙未進士除工部主事陞遼府長史左遷蒙陰知縣致仕歸教授鄉閭後仕進者多出其門孫玉正統戊辰進士除安肅縣知縣陞知大名平涼二府致仕

### 石 撰

石撰山西平定州人洪武中爲寧府長史靖難師至所過郡縣皆下撰在大寧獨欲爲守備計及北師攻拔大寧執撰終不屈遂支解而死

暴 昭

暴昭平陽浮山縣人洪武中以薦舉授北平布政司  
叅政二十八年陞都察院左都御史二十九年陞刑  
部尚書三十年五月奉 旨取大誥條因附載於律  
名曰大明律誥 上御午門諭羣臣曰朕有天下倣  
古爲治明禮以導民定律以繩頑刊著爲令行之已  
久然法在有司民不周知故命刑官取大誥條目撮  
其要略附載於律凡榜文禁例悉除之除謀逆并律  
誥該載外其雜犯大小之罪悉依贖罪之例論斷今  
編次成書刊布中外令天下知所遵守刑期無刑庶

稱朕恤刑之意六月署政平訟理二旛諭囚 上諭  
昭等曰人言法家少恩此後世用法之過朕觀唐虞  
之世好生之德洽於民心安有是言哉爾等每論囚  
雖詳其致罪之由然一時裁決恐未得其情自今論  
囚惟武臣死罪朕親審之其餘不必親至朕前其無  
罪應釋者持政平旛宣德意遣之繼令法官詳加審  
錄寃者卽爲奏聞無寃者實犯死罪以下悉如律其  
犯死罪者准贖革除二年充採訪使至北平知有變  
亟歸言於朝靖難師入京執之不屈 上怒命去其  
齒次手足次斷頭而死

李祐

李祐平陽安邑縣人以孝行重於鄉爲時宿儒洪武十三年以吏部尚書范敏薦其賢召授四輔官兼太子賓客未幾命祐司春季三月皆中旬十日太祖諭曰古以三公四輔論道經邦燮理陰陽陽順陰乖陰順陽戾者有之是由逆理而使然也人四輔恐上帝艱分善惡累時序之不常時以四季均職於四輔又以上中下三旬人各司之設若上帝福善禍淫變易爲殃着所司者比之混殽豈不利哉特以四輔所司明述於後以驗雨暘時若也祐同杜敷等侍食

殿庭賜衣三襲後以老疾還鄉甲子丁卯庚午三科  
考本布政司鄉試衆稱其得人未幾以疾卒於家

### 蔡瑄

蔡瑄山西蒲州榮河縣人洪武十三年以國子生授  
殿廷儀禮司序班尋改鳴贊十四年陞司正十五年  
超拜通政使司左通政賜衣一襲尋陞通政使爲人  
警敏善奏對勤於職事故爲上所眷厚二十年八  
月以疾賜還鄉里至高郵州卒上親製文遣祭賜  
鈔五十錠復其家徭役三年

### 辛彥博

辛彥博山西汾州人洪武二十年應貢補太學生擢  
監察御史歷浙江陝西江西三道二十九年陞都察  
院左僉都御史本年改少詹事三十年復除都察院  
右僉都御史永樂初降湖廣道御史三年陞山東按  
察使尋改雲南左叅政調浙江五年乃陞浙江按察  
使六年又降山東道御史九年陞福建左叅議十三  
年陞浙江左布政使後卒於官彥博爲人坦夷平直  
至臨事侃侃無所避爲御史以盡言規時政屢稱  
上旨爲都御史憲度嚴明恩威兼著故所至咸著顯  
績云



衛子剛

衛子剛蒲州人敏而嗜脩耿介特立爲鄉里矜式國初有司累薦其才以疾辭不就年八十三猶執易詩資治通鑑爲人懇懇講磨不倦學者稱條山先生子寧達於詩隱居養親善啓迪後進俱有詩集文稿藏於家

袁泰

袁泰萬泉人洪武初進士授湖廣鄱縣丞累官右都御史處心廉直執法不移理枉伸冤祛除民害一時善良獲安奸吏懾不敢肆

陳琦

陳琦霍州人洪武中舉人任和州知州有善政男女異路囹圄空虛庶乎古之循良後以長史致仕壽百有七歲

薛禎

薛禎河津人洪武中舉人任元氏玉田二縣教諭尋召爲侍從官進講書經大禹謨感動宸聽改榮陽縣學上親製勅并給符驗期以重用再歷鄆陵河內二縣學所至卓有師模士翕然宗之

史誠祖

史誠祖解州人洪武末以人才任山東汶上知縣老  
成敦厚勵志廉公平賦均徭勤於撫字政清訟簡境  
內稱安 文皇帝過縣稱爲循吏因撫其背曰何以  
得民心如此特降 勅褒獎陞爲濟寧州知州仍掌  
縣事賜織金紗衣一襲鈔千貫誠祖遂繡 御手於  
衣背在任四十八年壽百有十五歲汶人立祠祀之

### 周麟

周麟臨汾人幼嗜學博通五經永樂初鄉舉第一授  
清豐教諭造士有方陞肅府教授輔成王德與方伯  
執中講論理學有河汾益友之稱一時縉紳出其門

者甚衆有詩文遺稿

郭 睿

郭睿霍州人性至孝嘗從李白雲曹端講明性理之學永樂甲午鄉舉任南城兵馬指揮尋聞父喪徒步奔歸以不及治葬爲痛遂廬墓側後有白兔穴於廬次馴若家畜曹端作歌以表章之

張 福

張福蒲州人永樂庚子舉人歷醴泉鞏昌鳳翔學官陞國子助教出知平度州以績最衆 恩給誥旌異天順初入覲會 朝廷簡守令之賢衆 賜晏資尋

陞大名知府卒於官平度民立祠祀爲子侃由舉人同知西安府善剖決爲政有聲

劉元貞

劉元貞翼城人性至孝父平授宜黃知縣卒元貞哀毀踰禮旣葬廬墓三年羣鳥馴擾瓜蒂開蓮永樂間有司上其事詔旌表其門

史善

史善解州人宣德中貢士授邯鄲知縣清謹自持甚有惠政陞鞏昌府通判不阿權貴致仕家居州官行不法者數以直言勸阻邯鄲人立祠祀之

王約

王約猗氏人父早亡母牛氏遭風疾不能動履二十餘年約朝夕扶持躬侍湯藥不怠比母亡安葬如禮廬守墓側寢苦枕塊不飲酒食肉者三年正統初旌表其門

張琦

張琦安邑人正統中舉人由寧陽教諭陞高陵知縣在任四年興利除害專以孝弟教人雖有詐名養親者亦蒙獎勞若訪獲逆子奸猾輒寘之死於是頑夫悖子皆逃他境天性忠廉剛正而面貌蒼古人稱鐵

臉瀕死之日囊無羨貲永欲啓庫收耗金以贈琦曰  
此豈人所爲哉吾有數子耕者自能力田讀者自能  
力書足矣卽取其管鑰并符籍付丞而死子岫舉進  
士官至都御史剛果有政績

### 陶銓

陶銓絳州人正統乙丑進士授行人奉 命至太原  
會中官王振亦至聲勢烜赫銓竟不往謁歷陞陝西  
叅議愷悌宏博有長者風繼乞致仕與諸里居者爲  
九老延齡會夜有盜持炬入室見所有惟敝書舊衣  
竊嘆而去有司欲窮治銓曰彼以貧來值吾貧而去

奚究焉

柴良

柴良襄陵人正統丁卯舉人除廣安知州在任廉潔自命嘗捕殺寇擄寇銜之結無賴謀爲禍夜報寇至左右請避之良曰吾清官也寇至何爲且郡章將誰屬耶獨懷章坐中堂竟遇害郡人哀慕爲立祠祀焉

邢讓

邢讓襄陵人外樸內明敏於文藝書法得李北海體正統戊辰進士選翰林庶吉士陞修撰成化初超拜國子祭酒尋擢禮部左侍郎主考南京鄉試構得文



獻通考諸書數百部遺之邑庠以惠來學

衛英

衛英洪洞人景泰中舉人除鳳翔府通判兩遷至開封知府謹災蠲費務在全安小民居官不以妻子自隨歲所支俸錢皆付庫吏掌籍衣服車馬非敝不更造時人語曰有趙抃之清而少琴鶴有包拯之嚴而多仁恕一時治行以廉稱者英爲最焉任滿九年以河南叅政致仕累薦不起父母沒俱廬墓三年早失怙繼守義四十年不再婚巡撫韓邦奇監忠孝廉節坊以表其門

李 杲

李杲安邑人景泰丙子舉人授清水縣學教諭恭勤博覽嘗從學薛文清而德行粹白詩人多以理學師之

劉 琰

劉琰襄陵人年十歲喪父卽知哀家甚貧事母曲盡其誠後母疾不能動履琰常背負出入母卒不飲水漿者三日以禮殮葬廬於墓側三載面垢髮結日食饘粥親識有饋悉分散不少留蓄天順間旌表其門

王 衡

王衡稷山人天順中進士知淳安縣屏豪胥黥隸裁省軍需蠲不經之費以廉能稱擢監察御史巡遼東清理北畿軍政累條陳時務及劾鎮撫不職侃侃有奇節出守松江廣平二府陞浙江叅政轉陝西左使所至孜孜民瘼剛方有爲凡利當興蠱當去者雖阻以權貴弗少挫竟以被誣歸宅第隘陋不殊爲士日時以此高之

張璲

張璲字廷佩平陽府安邑縣人天順間進士選庶吉士改授浙江道御史成化時外戚萬氏恃貴妃寵幸

權軋中朝璫疏陳其十惡語過激戇謫古北口驛丞  
稍轉邑令磊落之節百折不回凡有便于民者卽當  
道沮抑勢要剛制畧無諱避必直伸已志而後已數  
年之後民咸歌誦之累陞太僕少卿卒

暢亨

暢亨字文通平陽府河津縣人天順中進士授長垣  
縣知縣大有德惠於民以治最徵拜陝西道御史巡  
鹽兩淮巡按浙江大著風裁斥貪懲墨時鎮守太監  
張慶忒威煽虐荼毒浙民亨疏劾之反爲所中傷謫  
涇陽知縣旋以外艱卒于家

李嘉

李嘉字允堅平陽之臨汾人天資凝重不妄言笑自幼卓有立志事親孝稍長縣大夫選補邑學弟子員前大學士董公倫時爲學教諭嘉從授業旦暮自勵所授書率誦讀數百過四書注釋雖老不忘已而念家貧親老丐罷歸侍養爲師者初惜其去遂獻詩達意其辭懇切師憫而從之後選奉祠所禮生事太宗文皇帝於藩邸敬恭祀事恒致其誠無幾丁父憂哀毀動人終喪不飲酒食肉覽父手澤未嘗不流涕而養母愛敬兼盡初世父希賢死於兵無子倉卒蒙

葬念及輒悲竟卜吉壤備禮而葬焉 文皇帝靖內

難預效守城勞時南兵逼城城外民有負母入城無  
所依者避舍以處之且食之粟民母子得全其急義  
率類此難平錄守城功召至南京有司奏授鴻臚寺  
序班數月 上親擢爲通政司叅議且面諭之曰以  
爾誠實故擢寘要地必勤必慎毋忝朕命嘉益盡心  
乃職一日奏事畢自陳臣有老母在鄉里無兄弟侍  
側願躬迎母就祿養從之旣至時初建北京奉命董  
運木之役於河南殫竭智慮夙夜不懈後喪母哀毀  
如喪父詔賜棺及驛舟歸其喪服闋仍前職遂扈從

北狩自是巡狩皆預扈從後坐累左遷鴻臚寺丞  
仁廟御極陞左通政使又坐累左遷未行 英宗嗣  
統復通政使改北京刑部侍郎念其老不堪繁務又  
改禮部侍郎雖精力日衰猶勉強蒞事未嘗少間再  
歲以疾聞賜勅褒諭命致仕又數月不起享年七十

### 薛瑄

薛瑄字德溫世爲山西平陽府河津縣人父貞洪武  
初年領鄉薦爲真定元氏教諭母齊氏夢一紫衣人  
謁見已而生瑄祖以生時之吉曰此必大吾門童  
時教之前書輒成誦日記千百言及貞改榮陽教諭

瑄侍行時年十二以所作詩賦呈監司奇之旣而聞  
魏范深於理學乃禮延於家供子弟職日與講習性  
理諸書久之嘆曰此道學正脉也遂焚其所作詩賦  
專心於是至忘寢食永樂己亥貞改河南鄢陵時教  
官考績以科貢多寡爲黜陟貞大以爲憂瑄乃補鄢  
陵諸生遂中河南庚子鄉試第一明年辛丑登進士  
第以省親西歸是歲秋貞有疾瑄日夜不離左右及  
居喪一遵古禮服闋選擢雲南道監察御史出監湖  
廣銀場瑄聞前監者多致富至則黜貪墨正風俗手  
錄性理大全一書潛心誦讀每至夜分方寢或思有



所得卽燃燭記之或通宵不寢味而樂之不知手舞足蹈也六年丁繼母憂十年服闋正統紀元提調山東學校瑄欣然曰此吾事也首以朱子白鹿洞學規開示學者每臨諸生必親爲講解不事榘楚皆呼之曰薛夫子太監王振之專政也問三楊曰吾鄉人亦有可以爲京堂者乎三楊以瑄對乃召爲大理寺少卿瑄初至京宿於朝房三楊先過之不值語其僕曰可語若主明日朝罷卽詣王太監謝若主之擢皆王太監力也明日朝退不往三楊使人語之亦不往時振至閣下問何不見薛少卿三楊乃對曰彼將來見

也知李賢素與瑄厚賢至閣下令轉致吾等意且言  
振數問之賢至朝房道三楊意瑄曰原德亦爲是言  
乎拜爵公朝謝恩私室吾不爲也作大理箴以自警  
久之振知其意亦不復問一日會議東閣公卿見振  
皆拜一人獨直立振知其爲瑄也先揖之曰多罪多  
罪自是啣之指揮某死妾有色振姪王山欲娶之妻  
持不可妾因誣告妻毒殺其夫都察院問已誣服瑄  
爲辯其冤駁還之如是者三都御史王文大怒又承  
振風旨誣瑄出入人罪譖之於振振嗾言官劾瑄得  
賄故庇死獄詔繫獄當死人皆危之瑄怡然曰辯冤

獲咎死何憾焉手持周易誦讀不輟及逮至午門會問瑄呼文字曰若安能問我若爲御史長自當迴避文怒甚于是不復問理詔擲於市殺之門人皆奔走瑄神色自若會振有老僕素謹厚不預事是日哭於厨下振問何爲泣曰聞今日薛夫子將刑故泣振問何以知之僕曰鄉人也備告其賢振意解會兵部侍郎王偉申救傳詔赦之放歸田里瑄居家六年閉門不出留心理學造詣益深正統己巳以吏科給事中程信論薦起爲大理寺丞時虜騎薄都城瑄分守北門都帥初疑其迂及接言論遂訪策焉瑄日以天時

人事驗之北虜必宵遁旣而果然貴州苗寇猖獗朝廷命將往征之瑄督軍餉事竣而還景泰初懇乞致仕學士江淵上疏留之明年陞南京大理寺卿有富豪殘虐人命者獄久不決執法者欲貸之瑄曰死者何辜竟抵於法明斷之譽播於民謠刑部尚書楊寧都御史張純初以才力相尚及與瑄同事歎曰如薛公當於古人中求之中官金英奉使道出南京公卿俱餞於江上瑄獨不往英至京言於衆曰南京好官惟薛卿耳壬申秋召至京復爲大理寺卿有草場火朝廷欲置典守者罪瑄力辯之獲免蘇松有饑民乞

粟富家客而不與遂火其屋蹈海以避罪時遣太子  
太保王文往訊之文以謀叛連及五百餘家衆皆畏  
勢莫敢發瑄抗章辯之文亦悟其非獲免者甚衆是  
歲瑄年近七十復乞致仕不允 英廟復位素知瑄  
學行遷禮部右侍郎兼翰林院學士召入內閣知制  
誥一日 上御便殿召瑄入語移時諄諄啟沃皆有  
關於聖學君德者尋命主考會試事竣轉左侍郎居  
數月瑄見將臣石亨等竊弄威權歎曰君子見幾而  
作豈俟終日乎遂引疾懇乞致仕居家八年四方學  
者從之甚衆瑄惓惓以復性爲教嘗曰此程朱喫緊

爲人處又曰學者讀書窮理須實見得徹然後驗其身心體而行之不然無異於買櫃而還珠也忽遘疾彌月衣冠危坐於正寢精神不亂悠然而逝時風雷大作有白氣上昇天順甲申六月十五日也瑄之學以踐履篤實爲本嘗曰萬物各具一理萬理同出一原是其貫通處也一言一動於理稍有違失便覺身心不安凡辭受取予必揆諸義一毫不苟晚年玩極高明默契其妙有不言而悟者矣其出處大節光明峻潔於富貴利達泊如也接人無大小衆寡一以誠待之教之有序而其言平易簡切不爲穿鑿奇僻之

說爲文必根於理辭旨條暢所著有讀書錄行於  
河汾集藏于家

韓文

韓文字貫道其先自相徙居山西之洪洞文將生父  
夢紫衣人抱送文潞公與之因名文幼負奇質才思  
溢發旣長從太史襄陵邢公遊學益淵博領成化乙  
酉鄉薦登丙戌進士初拜兵科給事中持節封韓  
府諸餽遺悉卻不受會左都御史王越總邊事邀功  
啓覈率同官列其罪狀又論薦前冢宰李公秉司馬  
王公竑可大用語語涉宮禁純皇帝震怒逮至文

華殿拷掠幾斃陝西紀功郎中張瑾疏總兵等官殺降用上命往覆之文以情之輕重具實還奏人服其公乙未陞右給事中直言爲當道所忌戊戌考滿始陞湖廣右叅議提督泰嶽太和宮分守荆南談者以用非其地爲負屈而文處之裕如勤於其職分守中官與其下皆嚴憚歛戢境內賴之又稽覈諸羨銀易穀創庾以爲荒備越三年用巡撫吳公誠薦改理司事會九溪酋長與隣境爭地相攻撫按屬文往視其爭遂息歷七年轉左未幾以外艱歸弘治戊申終喪赴部陞山東左叅政濟南之俗乘旱輒聚發人



墓暴其屍謂之打魁文曰是甚於疋巫之暴矣亟下令禁之越二年庚戌用倪文毅公之薦超陞雲南左布政使先是土官襲代旁支恃賄與力輒相仇奪士吏滿兩考者例不赴京復以境內轉相叅補皆宿弊也至文始立法釐正之越三年癸丑陞右副都御史巡撫湖廣地方兼贊理軍務武昌諸郡歲歉疏乞蠲逋賦以蘇民乙卯改撫河南值懷孟以北旱饑令所司發銀賑貧復竭誠雪禱致雨歲乃大熟丙辰轉戶部右侍郎丁巳以內艱歸庚申終喪改吏部明年轉左銓綜平允士論翕然歸之癸亥陞南京兵部尚書

叅贊機務先是會守備中官議事多遜避不發一言  
或探其意嚮以爲可否文曰事之可否有理與法吾  
惟以無私處之可拱嘿爲避禍計耶遇事輒昌言商  
確聞者無不敬服時值水旱相仍民饑而死者相繼  
乃移文戶部欲預支三月糧以平糶價所司以未得  
命爲辭文曰救荒如救焚民命在旦夕能忍死以待  
卽得罪吾請以身任之竟發米十六萬石民賴以安  
甲子改戶部尚書 敬皇帝勵精圖治文感激遭遇  
早朝畢嘗被召直至 榻前論鹽法廢弛邊餉空虛  
屬文稽考舊制及諸沮壞之弊文疏陳七事革關中

引鹽之弊革興販私鹽之弊革賤賣官鹽之弊夾帶  
殘鹽之弊革越境買鹽之弊革運司廢弛之弊指摘  
剴切甚蒙加納於是數十年積弊無遺公私告便時  
宣大聲息甚急需索供億復值大喪婚相繼并內外  
及各王府諸邊賞賜費用不貲悉心經畫緩急以濟  
太監苗達等征虜無效日費千金力爲舉劾甚銜之  
乃乞文督餉以圖中傷遂請究羽流幻術計還節盜  
帑物抑戚畹中貴占奪私買民田及舉正寓占引鹽  
乞討織造皆事干權倖怨謗叢集人咸危之文裕如  
也 武皇登極太監劉瑾等蔽 聖聰蠱惑百出機

柄竊持威福倒置虐燄橫空縉紳凜凜初承運庫內  
官差往南京織造照弘治年間奏計長蘆官鹽載至  
南京變賣銀買辦織造文與司官李夢陽王崇文徐  
廷用議曰今新政之初決不可准鹽課織造于是再  
執奏 上召內閣問之劉健對以內官裝載官鹽夾  
帶私鹽沿路害人 上曰內官固害人文官也有不  
好的瑾等益橫文追痛 孝皇深以 宗社爲憂首  
倡府部科道等官伏闕抗章暴露其狀乞置諸法  
武皇覺悟毅然欲從而奸邪營救有疏輒報中止于  
是瑾等手握口呿恣其播弄尋撥文細故捏寫旨意

降令致仕并其子高唐州知州士聰刑部主事士奇  
俱革職爲民復令邏卒伺察於途文乘一驟宿野店  
而歸邏卒無所得仍假失落簿籍復捏旨差官校械  
繫至京下錦衣獄會早朝有投匿名文書於丹墀錄  
瑾罪惡益怒甚監禁數月無隙可入該司具實上請  
仍被捏旨罰米一千石大同上納陸續更罰米二千  
石稱貸以給庚午瑾誅復原職 世廟登極臺諫交  
薦起用 賜璽書褒加尋加太子太保令有司存問  
復 賜之誥曰比因權奸之竊柄痛爲朝政之紛更  
乃能守正不阿以忠自誓倡危言而叩闕屹乎山岳

之難搖甘奇禍以忘家凜爾冰霜之不變天下仰其  
風采神明相其壽康起文彥博於九泉之餘人心攸  
屬繼韓魏公於百代之後家慶彌彰每宣讀畢文俯  
伏感泣痛惟老朽不圖復見今日捐館訃聞再 賜  
誥贈特進太傅謚忠定仍遣官諭祭營葬文以孤忠  
報 主甘受奇禍一時縉紳莫不爲之扼腕而彼惡  
直醜正之徒則或傍觀竊笑以爲不智其甚者忿其  
異已且從而下石焉其亦可慨也已

李進

李進字時勉平陽曲沃縣人成化己丑進士授戶部

主事遷員外郎郎中督餉宣府公于出納陞廣平府知府其地斥鹵恒苦旱進至特建石閘引河水灌田民利之改濟南陞四川右叅政江西右布政使河南左布政使陞右副都御史巡撫宣府時北虜寇邊諸將失利於魚臺嶺官兵多敗死言者因劾進進亦上章自劾遂引疾歸正德七年十二月卒

韓重

韓重字淳夫號拙齋世居絳州成化辛卯鄉薦第六人登戊戌進士授禮科給事中甲辰捧命查勘兩廣糧儲公帑充實諸可貸者悉予于民丙午陞本科左

給事中弘治改元再陞本科都給事中在給舍幾九載彈劾不避權勢貴妃萬氏久專上寵犯顏極諫

人爲悚懼時有西僧煽惑滋蔓上頗溺焉上章救

正庚戌出陞陝西叅政通歷八郡旬宣不怠巡撫王

公上最于朝丙辰陞本司右布政使清軍務督馬

政二載陞應天府府尹南都百司所在賦役繁重加

之權貴侵漁玩法難治重直以愛民爲念苟可興利

祛害靡不殫厥心力提調戊午鄉試得人爲多冬丁

母制辛酉服闋改順天輦轂之下益策精敏政受知

于上復提調鄉試得人之譽視南都尤著適遼陽



有警陞左副都御史往撫時奸宦梁玘在鎮怙勢肆虐按其不法亟疏劾罷之物論稱快僅一年勅撫湖廣黜貪旌廉平徭息民軍餉久缺爲請五十餘萬以給軍士乙丑擢南京兵部侍郎時缺正卿署選軍政兩月不歸私第權要不得請托正德丁卯轉北部未幾進南京工部尚書念東南民困上疏請停不急工役上詔允之是時逆瑾專恣懇求休致朝命方下瑾嗾黨惡中以浮言抑鬱疽發于背卒于揚州廣陵公館壽六十有九訃聞朝廷如例祭葬

史英

史英字廷珍蒲州稷山縣人成化戊戌進士初授棗  
強令未視篆俄報賊騎至率兵卽日擒斬後冀州盜  
相繼反獄皆勦平之於是賊不犯境棗強人好誣訟  
切諭之凡布禁五千餘條尋有酗酒不孝者英使其  
族人勸戒之其人遂以孝聞圖像朝暮拜謁焉其督  
課學校周恤歲凶尤爲懇至一時復業者百三十一  
戶遂增設興仁社以居之其與完聚資喪者五百餘  
人出俸買藥以療瘟疫者蓋千有餘人上官橫科不  
便於民者皆拒不聽及去棗強人立祠記之成化末  
陞河南道監察御史奉命清理長蘆鹽法國課充足

巡按蘇松常鎮時周駙馬兄爲蘇州同知貪聲大著  
卽據法首黜之他奸宄皆望風屏跡尋又巡按徽寧  
池太俗懼嫁女之難生女多淹溺嚴法禁之在臺中  
諸僚有所論列多各有所托獨謂山西無托英曰英  
大有所托顧諸君不知耳衆問爲誰曰托天天有仁  
心不受賄賂人有敬畏天命可保衆改容謝他日臺  
中糾一勢要疏成已印鈐矣至午門前猶豫不進適  
遇英問曰何以處之艷然曰疏至公所宜進不宜退  
遂進之翰林學士泰和曾公彥嘗稱曰剛明公正素  
厭人心云陞河南按察副使丁外艱閉戶讀書不與

人事亦不復有仕進之念矣都憲藍公章遺書曰士大夫不遭瑾毒手者史公數人耳學士張公天瑞常以理學稱之平生無私書每日已不容人囑知人亦不從已自謂愚庸又自謂無用號庸菴拙菴以自況凡有所得卽錄之成帙名曰就正一得諸藁其言多主居敬窮理平生不食兔肉有餽生兔者輒命放之以其父兔屬故也家居每夕必焚香告天祈壽福民性純謹嗜學丰采峻絕爲邑庠生恒以薛文清公自期待嘗大叅以桓榮稽古之力勵諸生曰聖賢事業或不能若金紫何足掛齒其持守之嚴官府多不能

識其面故其言之所至如此其粹云嘉靖五年十二月二十三日索曆日展視於本日上加一墨圈於二十七日上又加一墨圈子姓輩問故曰吾於此已矣及日果卒距生享年七十八歲

### 陶 琰

陶琰字廷信別號逸菴山西絳州人舉成化辛卯省試第一登辛丑進士丁外艱服闋授刑部四川司主事弘治戊申陞山東司員外郎故事刑部以獄訟繁劇奏讞惟艱擇老成明練者典部章疏謂之本科時大司寇特以任琰凡諸章疏無不委曲盡情事者而

諸司有疑事亦輒以屬斷比歲審錄又多所平反上下稱明焉未幾陞陝西按察司僉事癸丑陞副使整飭固原固原爲西邊要害唐陷於吐番宋沒於西夏成化初滿四之變三鎮幾搖固天下至險要區也琰至練士卒繕器械廣芻粟積數年邊無警居人以安辛酉陞福建按察使去任未逾月而固原告變日無寧居琰在福建廉介絕俗每飯惟一蔬甲子陞浙江右布政使半載積羨銀三千兩悉入官帑乙丑陞福建左布政使正德元年調山東至今閩浙士夫言廉者猶曰陶公琰云在浙時言官會列藩臬之賢者薦

於朝列置第一陞都察院左副都御史巡撫河南  
至則首黜賊吏黃金寶等屬吏震懾有望風解印綬  
者丁卯陞刑部右侍郎適陝西遊擊徐謙訐奏御史  
季高而謙故豎瑾黨也又厚賂瑾欲中高以危法會  
上命琰往覈其事琰據法直高謙以告瑾瑾怒遂矯  
詔下琰獄禁錮幾兩月乃罷官去瑾怒未已復兩以  
他事罰米四百石又追奪 誥命是時瑾勢方熾無  
敢抗犯者率首鼠謝過幾脫死而獨安之弗懼也庚  
午秋瑾伏誅言官交章論薦 詔起左副都御史總  
督漕運兼巡撫鳳陽聞 命單車至鎮至則廉得諸

幸豎官民之豪猾者悉治以律權勢斂手淮南爲南  
北襟喉貢獻必由之路中使往返求索無厭而督  
運武臣又往往侵漁其間爲奸利事軍民病焉乃榜  
諭以法未嘗有一人敢犯禁者辛未轉南京刑部右  
侍郎壬申七月河北賊劉六自北而南犯姚源洞賊  
王浩八已聽招撫人心甫安而寧紹瀕海屬邑颶風  
大作海堤毀者三百里居民漂溺者以萬數琰聞之  
憂甚乃親按其地亟出帑銀多方賑救仍委官築堤  
捍水自蕭山至餘姚凡五萬餘丈琰慮桃源賊譎詐  
難信乃奏設兵備及簡拔羣寮之有才者分守要



害處置周悉明年春賊果率衆突入境地琰亟臨督  
戰賊潰走進兵襲之餘黨悉平捷聞 賜璽書獎勵  
陞俸從一品又 賜白金文綺有差賊平之後琰以  
開化常山遂安蘭谿爲盜出沒要衝乃議城四邑凡  
六閱月而訖工因引疾求退 詔不許會總漕員缺  
復推往督之至淮一如前令然乞歸志益堅疏凡七  
上皆 溫旨褒答最後乃得請仍許乘傳歸歲給祿  
隸家居垂七年 廷臣薦者凡十餘疏辛巳夏 世  
廟登極乃復起總督漕政淮民喜迓於道左歡聲雷  
動尋進戶部尚書左副都御史仍任前職壬午改工

部尚書啓行之日淮民傾城出送歔歔號泣不忍去是冬三載秩滿 詔賜羊酒寶鏹癸未改南京兵部尚書加太子少保叅贊機務至南都屬歲饑死者相枕籍乃移文諸曹盡出其所積以助賑濟仍咨戶部預給軍糧數月米價頓平人賴以生者無算事皆已行而後具聞而又裁抑內臣進貢快船其數視常減半至今官民賴以弗擾時年七十有五累疏乞休言官疏乞慰留者再又具疏乃得請 詔加太子太保給驛歸如故仍令有司歲時以禮存問繼又 賜詔褒嘉琰有別業在城西二里許汾水之陽鑿池種蓮

開徑植菊每風日晴和輒命童子携筆牀茶竈引肩  
輿造之徘徊其間據榻吟哦寄情翰墨至壬辰七月  
以疾卒訃聞贈少保謚恭介 諭祭九壇遣官營葬  
琰天性至孝四時祠廟有事雖老猶夙興率子孫躬  
奠如儀處族以厚遇鄉黨以恩有窮困失所者恒捐  
金濟之有喪者助之以棺平居嚴毅人不敢干以私  
自奉節儉自常祿外一毫不取雖交遊贈遺一無所  
受每罷歸行李蕭然惟二竹筥而已節抗權奸清鎮  
雅俗貞方不詭少壯一節爲世名臣云

李 瀚

李瀚字叔淵自翼城遷沁水成化庚子占鄉試第一  
明年舉進士出知樂亭樂亭歲惡民流瀚至復者十  
六七卽貴戚豪橫亦各還民侵田邑門外有古木數  
十軍作祟吏茲土者多病死入爲公危之一日毀臺  
斬木得朽骨若干令野瘞焉竟亦無他丁未被徵拜  
監察御史奉命巡陝西茶馬弊端革殆盡歲滿代  
還以憂起按陝劾賊吏汰宿姦郡縣官望風懼伏有  
鉅猾流毒一方衆慮其難制設計擒捕窮治皆伏辜  
鎮守貴璫肆虐庇所陰厚遂擊平民暴諸市出見之  
立命解其縛捕告者抵罪終南山妖僧鳩無賴作亂

報使至密諭使者曰勿令鎮守知恐張聲勢輒擾民  
遂選將授方略而遣之比及鎮守知則已報擒矣其  
先識如此戊午復按河南事叢委至則裁決無遺尤  
莊毅率下有不法者相戒罔敢犯已未還道都御史  
屠公特檄掌諸道奏牘古北口守將吳昭以失律賂  
權貴波及無辜累案不能竟上命往督察昭竟棄  
市庚申陞湖廣副使又以憂去起河南副使陳州衛  
都指揮子世恩格殺項城典史瀚至適巡大梁卽收  
捕寘諸法所部帖然乙丑陞湖廣按察使丁卯轉河  
南布政使無幾遷順天府尹尋陞右副都御史董漕

憤漕政久弛銳氣舉行淮南守素結逆瑾貪復自恣  
劾罷之時榮王由運河之國戶部恐其妨運奏令各  
船分行兩河貴璫冀得賂動輒阻遏瀚適會議北上  
過天津遇王舟朝見司儀如 陛前贊禮瀚止四拜  
卽興且啓王嚴飭侍從勿阻遏運舟王聽納自是始  
不擾糧運官軍稱快已已徵入爲左副都御史時瑾  
虐燄薰灼公卿以下咸憚之中官楊鎮怙勢鬻販私  
鹽舟車相屬於道事聞瑾乃奏檄南都重臣按厥事  
守備貴璫劉瑯攘爲已有同事者匿諱比命御史督  
之方檄諸省償銀瑾以諷臺長臺長語塞瀚厲辭以

對衆爲股票瑾隨奏遣瀚往欲中傷之瀚往仍令瑯  
出所懷并劾落其職守餘咸不問時論壯之庚午陞  
吏部右侍郎尋轉左是歲瑾伏誅視篆月餘起廢疏  
壅士類允愜辛未轉南京戶部尚書往蒞政凡論析  
公庾府帑戶口田賦盈縮之數歷歷如指諸掌居數  
月請裁冗食節浮費廣儲蓄多見采納時廩藏虛空  
乘秋熟議發帑金代軍餉數月乃積米數十萬江浙  
諸藩歲輸布給軍士貴璫主之得因緣爲害奏令徑  
輸折色戶部人咸便之外守備有縱家人私攬歲課  
不輸官司噤不敢言瀚收繫獄不旬日宿逋完矣時

未及引年乃累疏納祿歸暇則追宋歐陽康靖在穎  
故事與曲沃司徒李公少宰孟公命駕相往來徜徉  
詠歌以終老尤篤倫理正士風婚喪冠祭悉崇古雅  
閭黨化之漸性鯁介不婣姁詭從見賢德愛之不啻  
已出晚所得益闕深故凡考德問業來者戶屢常滿  
歷官四十餘年所至鎮靜明不過察寬不至縱而賑  
災恤刑尤爲人所稱道平生廉謙捐察凡圖書冠服  
咸手自經理略不容人少觸居官不苟取所得俸餘  
止購海內圖籍故其家儲有鄴侯萬卷云

李浩



李浩字師孟曲沃縣人舉成化癸卯鄉薦明  
士第初授都水主事官呂梁洪故有役夫數  
草銀錢歲若干緡比至悉罷之止令  
用而已署鄰巨豪伺官府短長前任者  
於浩不敢近改戶部主事丁父憂服闋改兵部車駕  
主事陞員外郎奉勅清理畿內田凡豪右  
若干頃還之民陞職方郎中爲尚書鈞陽馬公所稱  
重委攝諸司章奏冊封代府潁陽王充副使凡所  
餽贈拒弗受弘治十三年陞通政司右叅議十四年  
轉左持節充正使封晉府雲丘王十五年歷左通政

正德二年轉左三年陞順天府尹時久旱疏論畿甸  
民所疾苦事當罷行者 詔嘉納之逆瑾擅政無名  
需求甚急一切裁抑數面議可否侃侃不阿瑾乃日  
使偵其過失然竟無所得也居二年改通政司使轉  
兵部右侍郎尋轉左兼理武職貼黃嘗攝工部篆修  
朝陽門城垣通州新城咸督其工乃疏慎郊圻固封  
守革冗費修戰具數事多見採納 山東盜平陞俸  
一級賜金綵幣丁繼母喪賜祭葬馳驛以歸服闋召  
拜禮部尚書仍掌通政司事未幾致仕

文 皓

文皓字孔暘號西泉絳州垣曲人成化丙辰進士授平原令明于讞斷有豪以更契誣入人田積訟累年一訊立決有奸于媼婦而其婦後爲人所娶者竟以盜誣之廉得其情寘于法又有縱火焚其仇家者乃集同里人詰曰縱火之人我已知矣一人跪最後藏首變色訊之卽服丁母艱歸起補衡水知縣清河民投獻德府莊田千頃百姓累年奏辨有司不敢決至是承委勘實田歸於民召拜監察御史劾留都張冢宰附逆瑾事時論稱快名重於西臺復上保民息盜以固國本六事曰擇民牧惜民財禁民奢節民力除

民賊剔民蠹咸嘉納之擢河南副使督理河道定議  
河夫五百里內者赴工修理五百里外者納銀買料  
遠民無奔走之勞近民省追徵之苦法令畫一民不  
告勞工有成績運道咸賴焉魯山寇以白蓮教惑衆  
剽掠官民一方荼毒計擒首惡百餘弃市餘黨潰散  
未幾遺書與子爲我營菟裘吾將歸矣遂上疏乞免  
弗允章再上愈懇得致仕比歸而子武卿等已於城  
北爲園構亭鑿池植竹木花卉以待因名其園曰清  
樂酌酒賦詩優游以老享年七十有八而卒門人私  
謚曰溫簡先生

王文

王文解州人幼孤事母以孝聞性沉默善於詩成化乙酉鄉舉歷武功汲縣教諭卓立師道雖盛暑必衣冠非公事不謁府縣張守稱爲古君子致仕杜門不出鄉黨高其行

張翰

張翰平陸人孝友純篤成化戊子舉人授朝邑教諭擢翰林院孔目與纂修憲廟實錄錫誥命賜金帛進檢討同脩國史歷重慶同知臨洮知府所至有政績後以不附逆瑾致仕歸居官三十六年家無

美蓄卒贈中順大夫

吳珉

吳珉靈石人成化己丑進士授吏部稽勲司主事歷陞右副都御史鎮撫甘州夷夏畏服改南京都察院尋致仕歷官中外三十餘年謹恪直方始終不踰當時在朝稱之有清不過韓文直不過吳珉之語

陳孜

陳孜浮山人成化中進士除知慈谿縣擢監察御史陞湖廣副使歷官貴州左布政使所至皆有異政後致仕進階資德大夫居官雖久蕭然如寒士歸葬繼

母至嚮衣器以備葬具士論重其清介

### 王泰

王泰翼城人愜幅有內脩成化中進士歷知儀封衛水縣陞南京刑部主事遷員外郎時逆瑾擅權劾索饋謝泰曰介人之寵其識不遠遂乞致仕及瑾敗詔起福建副使歷陞湖廣叅政山東按察使進布政使居官清慎公勤得失不驚未嘗阿人以求譽尋謝病歸莆陽林俊嘗薦於冢宰楊一清云泰溫粹類貫道孤持類公實而量過之中和兼備庶乎篤行君子也

楊謙

楊謙解州人弘治五年舉人任武城知縣以才堪治繁調諸城復謫平山衛知事武城諸城父老千餘赴闕爭保銓部以單縣尤劇調尹之流賊聞名遠遁卒保城池蒙旌異進二級益三歷縣官囊篋蕭然云

郭韶

郭韶霍州人弘治中進士任寧國府同知操履剛方不阿權貴寧人爲立去思碑擢湖廣兵備僉事破鄢蘭巨寇擒剿湖南流賊有功復備兵西寧進副使以治績蒙欽獎官至山東左布政致仕



劉 夔

劉夔字舜弼號黃巖世爲襄垣人弘治庚子舉於鄉  
明年辛丑舉進士與庶吉之選肆力讀中秘書癸酉  
授兵科給事中丁丑聘同考試試所取多名士辛巳  
陞刑科右復陞戶科左 世宗登極更新庶政有詔  
起用太監蕭敬上疏謂臨御之始不當先嚮用閹豎  
非所以令衆庶見也辭意俱烈疏入不報者累日人  
咸危之 上亦察其忠弗讓京東民田爲權倖所據  
民累訟事聞命夔往訊至則按籍悉歸之民權倖斂  
跡時以爲難是年以紫巖公爲少宗伯例改翰林院

檢討丁內艱甲申服除史職與修武廟實錄事竣  
當加秩而忽得外補謫判大名人以爲異處之愈閑  
至郡折節親簿書事長吏惟謹長吏益賢之暇則葺  
元城書院進諸生闡經義興尚文教彬彬多成材焉  
丁亥陞南京宗人府經歷歷南戶部郎中江西按察  
使司副使改提學河南陞貴州叅政調陝西陝山東  
按察使所至有聲嘗錄囚釋其寃數百乙未夏擢左  
僉都御史巡撫保定保定畿輔重地俗悍喜鬪歲薦  
饑民或聚爲盜至則按捕之節用愛人緩賦驅蝗民  
賴以安提三關邊警巨測飭兵食屯要害數親巡視

慨然有勒石燕然之志居三載虜不近塞輯寧保障  
之績民至今頌之又疏泊運河葺修嶽祠稱旨數膺  
璽書褒美賜賚加渥方擬歸嚮用乃爲言官誣論遂  
懇疏乞歸越六年忽遭疾不起年五十有七所著有  
黃巖集金陵稿恒陽集處州錄大名吟奏議七卷

### 馬 駢

馬駢字世用號梅軒解州夏縣人弘治丙辰進士初  
授行人奉使周邸未幾選工科給事中馬端肅公見  
其諫草驚曰董賈未之或先也尋轉左給事儀觀峻  
整進退中度 孝宗默眷愛之奉 勅清屯田於蜀

事竣還朝在侃直不避權倖嘗論李廣之黨宜躬治  
外戚之權宜禁戢諫官吳驥之狂直宜包容皆時政  
切要者 武宗卽位有白金文綺之賜旋擢刑科都  
給事中正德戊辰廷試掌試卷時宰臣某與逆瑾結  
納勢焰方熾衆觀望意指欲以其子魁天下獨憚驥  
抗直驥得涇野呂公卷倡言宜首選已而涇野竟得  
首選如其言時逆瑾用事驥以職當盡言不少避忌  
瑾亦多勉從之有附瑾新入爲給舍者對賓僚誇毗  
甚有祿色驥鄙之以無恥客皆縮舌先是逆綵拜瑾  
爲義父驥人銓衡驥自蜀還與綵父宿同驛館不與

交一語綵聞之以爲慢已會時宰夙憾駢遂乘以搆  
毀出爲淮安府推官旣視事怪獄吏日報囚病時方  
大疫乃躬造閱獄間竦放流徒以下幾數百人大辟  
申救而獲生者三人揚州民以所假姻家金器令家  
童送還途觀優戲忘而失去匿入淮淮人不知也留  
爲傭一日遇故主詰其由紿謂淮人迷以藥攘其金  
執之使不得還遂訟於官治淮民罪宜死大以爲疑  
曰楊淮地咫尺旣取金乃復留傭其人殆不近情因  
取成案所具藥俾獄盜服之殊不驗蓋淮民被拷而  
誣服藥冀寬刑責爾因容於當路竟釋焉他如鹽城

張生忠元夕遇豪家婦於隘巷家僮爭道毆辱生羣  
生不能平明日相率詣豪家褫婦衣報之豪家富且  
健訟生遂黜駢知非生罪且廉其貧出金爲生贖罪  
又一日有蕭尹者被誣逮亦爲白其誣尹後官至中  
丞其他平反多類此行部不盛張騎從老弱歡迎觀  
者如堵郡守華公璉適並出見之因嘆以爲平易近  
民不可及也後改官過淮百姓聞而出迎者相望於  
道郡有何烈女申進妻徐氏皆不從淫暴以死至則  
爲表墓立祠且撰雙烈記以媿士夫之失節者先是  
流賊逼境規畫嚴密賊知淮口不可渡竟遁去時陶

恭介公疏薦於朝委之儲備軍粟旬日得金凡四千  
有奇士民告保留者無慮萬餘人瑾黨旣誅海內以  
騷當復舊物宜殊擢然僅轉同知松江旣視築松松  
多富屋畏騷之廉豪不能肆數年逋稅一朝報完都  
御史王公力薦之會丁外艱歸中途得邸報有擢守  
饒州之命服闋再補守鄖陽鄖陽在萬山中路多隘  
過而默計之及蒞政量罪人情法可贖者俾修鑿之  
不爽尺寸由是遂成坦途有罪人陳文臯者忿鄖民  
負楮貲詬詈取償民毋觸柱而死誣文臯重獄察之  
文臯卒免焉他若創桴橋葺廢坊育賢養老振學課

農敦風振俗屠奸剪弊鄖陽之人無近遠皆忻然昭  
蘇有顯宦嘗以法及其姻黨陰嗾之遂免歸先是有  
說騃宜少貶從容者正色曰窮通顯晦命也如命何  
平生以直道忤權貴用是仕路蹉跎然天下公論亦  
以是重之嘉靖九年卒得年六十有五

張潤

張潤字汝霖臨汾人弘治戊午舉鄉試第一人壬戌  
登進士授令宜陽清修有惠政正德丁卯擢刑科給  
事中抗言大計侃侃不阿奉詔覈甘肅邊儲稽察精  
明河外震懼還遷禮科右吏科左戶科都給事中時



盜賊延蔓屢用大師水旱流移征調繁急濶請嚴紀  
律酌轉輸廣招撫時賑恤章數十上採納爲多甲戌  
擢順天府丞戊寅擢左僉都御史巡撫順天至則黜  
貪殘拯彫弊條上邊民疾苦及便宜十餘事悉見施  
行郊圻盜起虜復寇邊指授方略盜平虜遁有白金  
蟒衣之賜已卯以外艱歸辛巳起撫寧夏夏弱鎮也  
不百里卽虜巢濶簡士馬振紀綱謹烽埃修築亭障  
聯絡聲援境內晏然講教屯田鹽馬諸政日奏正豪  
藩悉抑宦鎮問遣餽遺一切絕之癸未召還理院事  
乙酉以九載績晉左副都御史理院事五年署篆者

半振揚法紀臺中肅然每疏上皆切中時務丁亥以大獄譴歸臺諫屢請錄用己亥詔復原任遂轉兵部右侍郎又轉戶部左督餉太倉接連挾隱剗洗奸蠹兵民懽服明年晉工部尚書時大工並興漏卮乾沒百出躬勤省閱宿弊盡祛廼請酌緩急爲先後上忻納之力專功遄費省舊之半屢賜金幣褒焉辛丑以內艱歸服除言官復請亟用爲考察內僚起爲南京吏部尚書蒞任卽甄別去留輿情胥服再疏乞休皆荷溫諭不允戊申以考績赴闕畢卽過家懇求致仕時已改戶部尚書仍督太倉矣上亮其誠乃

允焉家居優游林壑足跡不及城市然每聞朝廷一  
善政輒喜動顏色見民疲役冗每悵悵不自安持守  
堅凝動有恒則雖事變猝至處之裕如初使甘歸逆  
瑾索賄無以應欲中危法屹不爲動然竟莫能害也  
廷推巡撫時逆寧使人曰欲副乎欲僉乎意以賄爲  
差也曰惟辟作福人臣敢有擇耶寧深憾欲中傷會  
敗乃已 毅皇西幸寵閹請改榆河驛爲行宮力陳  
民貧財拙仍舊爲宜 毅皇從焉正位司空權貴目  
工役爲奇貨陽施陰奪悉以法裁之勲戚某時主夫  
役請發太倉銀助工實欲私之力爭曰此朝家正脉

軍國仰資急近利而廢遠圖豈人臣謀國忠耶事乃  
寢其積不能平屢以危言休且草彈文示之不顧也  
臨事精詳必求可久之計宦蹟所遺雖名人繼往率  
取則焉天性孝愛事親色養弗違親終並獲祭葬益  
異數也兄滋弟灌皆爲納八品散官處宗族恩禮兼  
盡歲時祀先必謹訓諸子孫嚴而有則自奉無異寒  
素歷官南北行李蕭然好學問文章雖老不倦所著  
有奏議公移尋是錄試筆稿經略兩鎮詩若干卷藏  
於家壽八十有三訃聞賜祭葬贈太子少保謚恭肅

成文

成文山西山陰縣人弘治壬戌進士授知縣擢監察御史巡按蘇松遇歲饑條上便宜民賴全活復按陝西劾奏鎮守太監宋彬冒首功且言內外大臣朋肆欺妄力觸權奸逮詔獄爲民嘉靖初起知鳳翔府累陞至右副都御史上疏乞骸骨至嘉靖十九年卒賜祭葬如例

史魯

史魯字宗道號首山平陽蒲之大家也正德戊辰登進士授鎮江府推官時羣閹擅政治多苟且至則誅鋤豪猾治其尤者數人一郡肅清江東訟者皆欲赴

之曰史青天云決久寃之獄人祀其惠寢懷金之謝  
衆服其廉裂大宰之刺人莫干以私三年而政成頌  
典當道交章論薦之擢給事中比當權瑾之後言路  
久塞公以諫諍爲已任彈射皆當權貴自吏部尚書  
下二十餘人旣而又劾叅贊司馬及守備太監曰表  
裏擅權淫朋也寧藩宸濠逆節已萌人皆知之然濠  
權術巧中嬰之者奇禍立至又以離間典重在廷無  
敢言者魯乃首發其奸曰濠必爲變無疑也又上疏  
請省國用以節民財蓋前後二十餘章洞切當世之  
務會師臣不合於倖寧寧噉稔奸枉狀訐師臣守備

太監素善稔奸因竄魯於狀曰給事中師臣門下士也遂罷歸卒嘉靖己亥年六十七歲

### 楊守禮

楊守禮字秉節號南澗蒲州人正德庚午舉於鄉明年成進士授戶部主事歷員外郎中陞河南僉事丁父憂起復湖廣時荊州有大盜流劫湖湘間有司不能制改副使駐節荊州至則絕口不言盜賊事俟分布已定一舉殲之衆以爲神會以芮傑事忤執政遂中以徵文謫判叙州府是年華陽饑民多流亡按撫奏任成都知府多方賑濟流民底定陞四川副使尋

陞陝西按察使轉左右轄時四川蠻夷擾亂遂陞右副都御史巡撫四川親歷營寨激厲將士不三月竟誅渠兇五寨悉平改撫寧夏時虜酋吉囊駐牧寧夏歲苦侵掠鎮兵多求內徙至則稽舊籍以實軍伍復關隘以扼虜衝併屯戍以寬士力虜烽以熄陞右都御史總督三邊尋加兵部尚書初陳邊務以固守爲先連年虜東寇山西詔抽延綏兵互爲犄角虜遂乘虛直犯花馬池率衆乘城激以重賞出精騎直當虜營虜來薄城輒斃于矢石遂逡巡遁去在鎮三年五降勅嘉獎賜以銀幣加太子少保丁母憂解任以歸



家居十餘年卒賜祭葬如例

趙載

趙載字文載初舉進士名君琰武廟御賜今名蒲州垣曲人也中正德丁卯鄉試辛未進士授戶部主事陞員外郎郎中奉命督漕上疏極言漕政利病舉籍籍起陞陝西叅議撫治商洛嘗剿巨寇有白金寶鏹之賜土魯番侵奪哈密爲邊患總督遂菴楊公知其才薦爲甘肅兵備副使時議者欲掩魯番擊之載言外攘必先內治宜實糧餉利器械固堡寨謹斥埃用間謀及倣趙充國墾田故事食足兵乃可舉否則

虛內事外徒啟邊釁疏上議遂寢於是銳氣屯種開  
鹽召商實粟塞下期年而士氣大奮所戰克捷番酋  
牙木蘭帖木哥等率衆降者萬餘人又酌屯田便益  
十數事條上俱獲允行陞陝西叅政仍兵備甘肅遂  
陞僉都御史巡撫其地仍兼理屯政載稽歲所入以  
革宿弊人不能爲欺邊方素不知學爲擇師儒以教  
學官弟子諸番入貢每乞增額奏請遵守制驗放以  
省供億鹽引課令折兼輸以便商賈虜至督將士出  
戰凡所斬獲親効功次革冒級守邊數年政績大著  
陞南京都察院右副都御史提督操江旣去任猶陳

邊務十二事曰此吾所已試者俾後人守之耳然是時言者摘他事劾之秦旨聽勘久之事得白衆望方殷而尋已不祿矣享年六十有二計聞詔賜諭祭命有司營葬復以邊功錄其子爲國子生蓋異數云

### 陶滋

陶滋字時雨山西絳州人正德甲戌進士選行人司行人屢承命冊封藩王贈賄一介不取凡厥所至如上親臨咸敬憚焉會宸濠構逆陰結權貴詐設淫樂誘致萬乘天下皆知其謀獨武廟未知必欲南巡舟行有日矣滋及朝臣危懼急抗疏極諫武

廟震怒械繫而廷咎之幾死時死甚衆巡幸由是止  
無何亂作乘輿無虞諫之力也其爲諫首而生者悉  
左遷滋遷太學學正之任躬率諸生修德講學廟列  
周宣石鼓有毀爲曰者文多殘缺歷代諸儒如韓愈  
鄭樵皆病於誦述獨考索精詳爲石鼓正誤一書幾  
完其文讀者快焉已 賜還初職尋陞司正錫命褒  
嘉嘉靖癸未陞刑部河南司郎中有滯獄數十淑問  
得情決之囹圄頓空尚書金公獻民稱之令掌奏牘  
總部事有梁錦衣者懷金五百求援重辟及見知不  
可乃已 是秋轉兵部武選司郎中革吏弊塞倖門一

時武弁感激生勇氣焉甲申大禮興奏議不合械繫  
廷咎如前仍謫戍榆林戎服從事將帥恒以方略咨  
焉丙申蒙恩宥歸戍戊戌秋疾甫三日卒

景 溱

景溱字濟之號蒲津蒲州人正德庚辰登會試辛巳  
賜二甲進士尋授南京監察御史任甫數月卽糾論  
武臣干進詞連中貴及郊迎闖戚貪功冒封語侵宰  
執士論稱直留都倉場中宦久依爲市撽詭冒慎出  
納革樣米禁公私科擾儲政一清時以前疏觸中貴  
怒削籍而歸家食旣久克養日遂離臺余公光薦其

才賢奉命復起北臺丰采端凝論思忠懇每監禮隨  
駕敷奏趨蹌肅有常度 上時注目焉尋按畿內首

劾貴臣繼疏止薊山開礦以及興利辨冤救荒疏凡  
百上咸稱旨官民甚賴之將代 詔築沙河宮城司

空奏檄近郊民供役時北虜數入寇關隘久壞又吏  
治多污徵歛日煩條上四事曰慎選任以清政本溥  
實惠以厚邦本增邊防以固邦圉停修築以寬民力  
上皆嘉納城工得暫停後二十年虜犯近郊卒如漆  
言繼監于西畿試防範有方尋按江右江右俗健訟  
多貴臣號稱難理旣渡江嚴科條數十款洞悉民隱

禁教誘抑豪右吏民懷畏誦之不衰會 章皇后梓  
宮下九江迎護月餘寢食俱廢檄所司肅祀儲備無  
敢不虔而諸護使餽遺咸謝罷使者不悅冀有以中  
之會風便龍舟一夕渡湖 上聞賜文綺兩按南北  
黜貪墨僥倖弊廉拔滯糾名覈實凡所舉刺賢否心  
服律已清正御下溫嚴日費不百錢每行郡必令有  
司檢封衣笥江右北還衣多敝不充原笥雖圖書亦  
不少携諸司以趙清獻目之所至興學課士斥浮崇  
正昌黎表韓公祠豫章建文謝祠修白鹿書院申明  
教規英儁多出其門登顯仕者繼典刷京畿卷主閱

中臺章奏咸務尚體要中丞獻替多所草定以年勞  
擢順天府丞約已除蠹官府肅清會司徒議徵畿民  
牛車空運京粟出關卽疏陳不便民狀仍上便宜數  
事竟從其議無何疾作累疏請告清議重惜之先後  
家居三十年杜門謝客讀書賦詩教子耕讀坐卧一  
小室闔堵不治囊無餘資澹然如寒士足跡不入公  
府人不敢干以私獎勵後進疊疊不倦每聞軍國重  
事繫思魏闕慨然不忘監司表薦數十竟不起歿之  
歲无日有龍起于舍中旣病革兒童聞空中鼓吹音  
忽雷雨大作乃逝



亢良玉

亢良玉臨汾人爲府學生事父母能色養得其歡心  
母卒廬於墓側朝夕哀號有朱草叢生東葉如蓮之  
異正德四年旌表其門又有同邑張璽李大經曲沃  
人靳馳萬泉人王寵並以孝行先後預旌典

陳韜

陳韜絳州人正德初以貢士任山東萊陽縣丞會流  
賊犯城韜率衆拒之與其子皆遇害事聞贈登州府  
通判 賜祭并令有司立廟廕子榮入監

許翔鳳

許翔鳳洪洞人正德辛未進士任上蔡知縣時承流賊蹂殘後翔鳳安集撫恤旬月如初陞監察御史按兩淮又按畿內抑強禦繩官邪臺中有老成之譽陞陝西叅議上疏乞休居鄉忠信醇厚雅好山泉每發藻詠自陶其志

劉憲

劉憲靈石人爲邑學生性朴實有孝行父先歿母八十餘歲正德六年流賊入境憲負母避難賊至憲曰寧殺我勿殺吾母遂遇害御史相繼以事聞詔旌其孝令立石賜金助葬

劉翀

劉翀平陸人事親以孝聞舉正德中進士授行人擢御史清戎山東巡秦邊復按畿甸補救時弊多所建白又奏宸濠之變糾李隆之事挺然勁氣不回時稱真御史

楊瞻

楊瞻蒲州人正德中舉人初知扶風樹德單惠誨士足民三載績最擢御史疏請薛文清公從祀孔廟雖朝議未果已服其論思得體矣及按江北作石堤以障水患裨賢能以懲貪汙人以真御史稱之陞四川

僉事平險阻繕橋梁息盜賊川北之墟田牧安堵人  
後稱爲靖江楊焉三履之民至今尸祝之謝政歸讀  
書談道賑窮賙乏而平生孝友之篤尤人所難及者  
爲祀先睦族錄行於世後以子貴贈兵部尚書入祀  
鄉賢

崔吉

崔吉平陸人由歲貢授華州同知以貞士習釐民俗  
爲首務躬修節約不自膏潤嘗清稅却金平生雖家  
貧而孝友曲盡居處嘗列箴規日自檢束澄心體驗  
有得期力踐之在華州疾篤猶執易西銘易簣始輟

見

王珂

王珂蒲州人正德己卯中鄉試卒業成均時 詔纂修武宗實錄遂膺首薦嘉靖丙戌登進士第緣素重史望授中書舍人每代言稱 聖意命待經筵多所啓沃館閣見推焉平生心持清介性薦孝友博極羣書爲後學之師範嘗著自省篇楊少保博稱之曰議論切實與濂洛關閩相爲表裏編修張四維爲之註釋後入祀鄉賢

喬瑞

喬瑞霍州人嘉靖丙戌進士任西安府推官決疑獄  
多所平反執法抗秦藩歸侵田設法賑荒民獲免於  
死徙歷大府官至山東右叅政所在率有異蹟

李錦

李錦芮城人性至孝母卒哀毀不已廬墓三年弘治  
間旌表後以貢入太學父卒復廬墓側以疾卒于墓  
所子澤孫柄居親喪一如錦時人謂之三世孝思

陳希良

陳希良絳州人弘治中舉人任真定府推官廉毅有  
爲不徇權勢爲中貴所陷死於獄人皆惜之

張鵬

張鵬字鳴南號漳源汾西人嘉靖丙戌進士授河南府推官時方弱冠明刑慎獄雖老吏弗及也父卒于宦邸幾無以爲歛郡守范君代備棺衾始克襄事服除起補衢州府以治行卓異徵拜監察御史卽上經略七邊封事 上嘉納之按甘肅虜犯靖虜安定諸地大被殘掠將領匿不以聞而總兵時陳貪殘特甚鵬悉其狀正法治之邊政始肅復按山東時膠莒之地民多流亡所遺荒田數千頃招集開墾薄徵其稅踰年皆成沃土於會城立湖南書院選齊魯諸生肄

習其中躬履省之文教彬彬聿興焉壬寅入當京畿  
道陞大理寺丞會審大辟毅然持正不徇 上有羊  
酒之賜履任甫期而疾作上疏乞歸竟以不起年四  
十有四耳有諫草及遺文八卷藏于家

楊 博

楊博字惟約號虞坡蒲州人舉嘉靖己丑進士知陝  
之盤屋徙長安徵拜兵部武庫主事遷郎中故相翟  
文懿公奉 命犒諸邊參幕府當是時宣大卒悍驕  
屢戕其帥博告文懿以便宜撫諭之鎮賴無事至肅  
州屬番數百人遮道要賞文懿欲弗予不能欲予患



來者滋衆無以應博請文懿坐堂上數以命使至不  
悉衆遠迎將縛以屬吏番人叩頭再三請乃釋不罪  
而稍賚其首至者諸番感且畏竟不敢復來文懿還  
首薦于朝 賜白金文綺改職方郎中博之從文懿  
也起遼左迄甘肅行萬餘里具得其山川陰陽士馬  
強弱怯勇民所欲惡之大端及在職方虜數入宣大  
山西撫督奏報一夕十數上懸度立斷悉中機宜時  
出奇畫衆謂未必然已而無不然 肅皇將有討於  
安南請先以文告及乞降請許以自新因疏便宜六  
事 肅皇盡用其策益知其材可大用故自山東提

學副使山東糧儲叅政不四年超拜僉都御史巡撫  
甘肅初罕東諸屬番以避土魯番居肅州境上其後  
族類日甚強西人以爲憂而力莫能遣詔語之曰若  
屬羈於此謂暫安可耳非所以計久遠也今自白城  
至金塔水甘而草肥吾爲若築城堡作渠壩給耕具  
俾往居何如咸叩首曰幸甚遂築城七計地與人置  
食用之器咸備以示諸酋諸酋謹呼徙出塞遠者至  
百五十里鑿龍首等渠墾田三萬餘畝召民耕其中  
又請以巡按御史督學政西人由是富而知學虜嘗  
大入士競效死戰斬首百四十餘級 賜詔嘉獎晉

右副都御史丁母憂西人遼道泣留窮陬孤戍至今  
以爲尸祝仇鸞之未敗也博與總督曾襄愍公論之  
徵下詔獄而時襄愍方議逐套虜修東勝及故受降  
三城期並河爲塞鸞與其黨詆爲生事卒殺襄愍庚  
戌虜入薊薄都城鸞以勤王有寵數毀博 肅皇知其  
情竟不能害于子鸞殛死會服除卽家拜兵部侍郎  
兼僉都御史經略薊保二鎮庚戌之變虜實道潮  
河川入議者爭請爲備而水湍悍不可城乃緣水築  
墩離立錯峙墩置戍守虜遂不敢掉臂其間秋 召  
還提督京城九門故事歲七月輒分兵守陴如寇至

博曰此自疲術也亟罷歸其營兵不勞而費省冬

詔總督薊遼保定軍務選士馬繕堡堞除戎器操必

勝以待攻無何虜寇古北口號二十萬連營百餘里

身被甲督諸軍禦之虜屢攻不得入則併力攻孤山

堡夜攀堞登我軍斫其腕墮虜氣大沮 肅皇馳賜

緋矛出帑金巨萬犒士博宣布德威諸軍益感奮殺

傷虜無算已又募死士持火器夜驚其營竟夕四五

發虜自相蹂躪死比明悉遁去論功晉右都御史兼

侍郎蔭一子錦衣衛千戶明年萬騎入馬蘭峪擊却

之幾獲其酋打來孫 召拜兵部尚書尋加太子少

保黜陟將吏人莫敢干以私丁父憂戊午 召還本  
兵方疏辭會虜圍大同右衛急 詔博往援乃墨縑  
出關虜聞曰楊太師至矣遂解圍去先是右衛被圍  
久其將士固守無二心疏請褒卹條戰守及善後十  
事奏行之又築牛心等堡寨墩臺二千八百七十二  
座濬大濠二長各三十里小濠六十四交互聯絡虜  
左右顧不得騁而南晉太子太保兼左副都御史虜  
酋哱素時以輕騎擾邊計擒之斬其黨十五人分兵  
襲擊斬獲又若干人未幾虜入薊州 詔移鎮薊畫  
地爲十區檄將分區拒守而三耀武於邊諸酋震悚

終歲無敢近塞者 召還掌部事加少保權倖不便  
其所爲往往爲飛語中以奇禍 肅皇悉拒不納更  
下諭褒美諸邊奏捷 賜本兵金幣特加一品考績  
賜羊酒授勲柱國於是讒忌始息癸亥秋虜且窺薊  
前鋒走遼以策禦虜援詐檄止其行不得手爲書三  
止之又不得乃嚴備京師而檄諸路提兵赴 闕下  
後數日虜果踰墻子嶺犯通州烽火徹御宮諸邊兵  
望日馳入援一日夜雲集虜驚謂神乃解去乙丑以  
一品再考蔭子國子生改吏部尚書未幾 肅皇帝  
崩 穆宗莊皇帝奉遺詔錄忠諫舉遺佚修平浪豪

功 召諸舊德布在臺省郡邑長吏有聲績增秩示  
勞不輕徙官一時所稱善政多博贊畫之功以一品  
三考晉少傅兼太子太傅再蔭子國子生巳巳論事  
忤 旨會左右倖臣多毀之者謝病歸辛未 莊皇  
帝 詔以冢宰行兵部事 神宗嗣統邊警益稀  
詔還吏部以一品四考晉少師兼太子太師仍蔭子  
國子生 賜賚甚厚癸酉分獻夕月壇疾暴作扶歸  
上疏乞致仕 上不允加賜餼牢酒米又疏辭謂有  
不忍言去之狀三不得不去之情三 上乃諭 賜  
乘傳 命子俊民俊卿侍行至蒲數月卒 上聞震

悼輟視朝一日賜祭葬贈太傅謚襄毅蔭一子中書舍人

王與齡

王與齡字受甫平陽鄉寧縣人母李夢有蛟龍蟠巨樹寤而生幼凝重不狎羣童九歲與兄培齡從安陽崔後渠先生學咸見器重嘉靖乙酉領鄉薦己丑昆弟咸登進士培齡尋卒辛卯授蘇州府推官以少年佐劇郡獄訟咸平無滯官有憤人盜鏡者嚴掠之謂盜甚微不足治且近誣姑俟之竟獲真盜乃伸前寃者海寇董氏聚衆攻殺大姓顏氏之族或支解之竟



捕伏法而散其衆甲午權戶部主事以廉能不擾調  
吏部驗封司主事更考功文選遷稽勲員外郎丁父  
艱起復晉文選郎中以用才罷庸爲已任上疏條故  
事請抑奔競清仕途重撫臣責成守令奏報孜孜力  
行用人務進廉靖老成痛繩僥倖絕請謁常州知府  
應君子才以廉不阿上更代延見訪問吏治民瘼衆  
莫敢望子才由是顯權力遏貪殘用張治典正論幾  
振而分宜之螟蛉子已漸盜大柄卑侮省郎橫侵銓  
柄有所請托一切峻拒之其來益瀆乃率同官上其  
事竟以是報罷一時知名之士咸外謫銓部自此喪

氣吏治貪冒日甚計貲得官計日求擢而民不聊生  
寇盜充斥矣歸平陽角巾躬稼圃怡然自得仇者媒  
孽萬端竟無可乘二十餘年忽自顧泥丸上神出備  
紀其事無何遂卒

梁 格

梁格字君正號定齋稷山人嘉靖乙酉領鄉薦乙未  
登進士第授濟陽知縣濟陽劇邑也其俗諉而喜訟  
或爲虞之格曰顧爲治者何如耳比至訟者羣集盡  
收之越數日別淑慝察情僞懲者若干人旌者若干  
人於是民稍安輯而訟亦衰止先是兼并之家地匿

而稅不辨乃履畝而計按籍而覈未幾得隱田萬畝  
分別肥瘠差爲三品各立文簿姦吏無所容詐又勞  
來不怠善於撫循於是復業者甚衆其地通舟楫商  
賈恒苦無名之稅至是盡罷之又定賓旅往來之式  
其費省約民甚德焉丁酉 章聖皇太后梓宮返葬  
承天道出東郡濟陽屬當供億而闔寺橫索無厭勢  
焰赫奕同事者咸遜避獨毅然以往卒事不淆諸闔  
寺知濟陽賢亦皆歛跡云審訊明敏諸郡縣難決之  
訟多屬之禹城有冤獄累歲不白監司移鞠之得其  
情一縣盡驚它日禹城人持數百金以謝曰法當如

是非私爾也竟卻之居常慕薛文清之爲人鋟其言行錄於官舍誦而法之又自奉貶損纖毫不敢下侵嘗扁其堂曰一鶴一琴亦是身邊長物匹夫匹婦孰非膝下嬰兒其自信有如此公暇親詣學舍課試諸生出其門者皆循循雅雅濟陽自是多德藝之士矣都御史御史各薦於朝先後凡十有三疏及滿去百姓遮道泣留送之者相屬於道越宿始罷徵授南京兵科給事中旣陞辭過文安謁紀先生墓始行抵平陽聞太宜人訃擗踊踰節遂嬰疾旣襄事乃於墓所建永思洞維則亭葢致終身之慕再踰年竟以哀毀

卒年四十有四所著有窺易集四書古義補及定齋存稿藏于家卒數年伯子紀仲子綱季子維相繼舉於鄉壬戌仲子綱登進士授戶部主事

裴紳

裴紳字子書號右山蒲州人嘉靖甲午舉於鄉戊戌登進士授行人辛丑擢監察御史督理長蘆山東鹽課近京多奸民依憑城社私販大行首禽鄭尚書僕置之法仍對仗彈尚書奪俸比代無復私販者乙巳按真定是時虜連寇太原議增紫荆諸關埤塹事竣有白金文綺之賜丁未按浙江上海防六事紹悉從

其議蓋是時海盜漸不靖矣朝議設都御史督軍務而都御史者顧捕戮平民報首功紳檄臬司問狀以其不克肩重任條言其事自後海寇益倡諸建白防禦計無慮數十上率無越其議者戊申丁父憂起復陞山東按察司副使提督學校崇實學杜請謁諸所辨拔皆藉藉有養之士乙卯陞河南布政司叅政撫守汝南其冬丁母憂戊午起復補四川布政司叅政庚申陞江西按察使辛酉陞河南右布政使未幾卽拜都察院右僉都御史巡撫陝西壬戌春虜犯延寧聞警提旅馳之過其南下于是朝議謂總督程公不

任事擬紳代之其冬虜果自寧夏入紳督衆迎拒斬首八十餘級以捷聞益飭內備簡西安等衛卒三千人奏設叅將一員團練會城陝當滇蜀孔道民苦于供億有忻城伯某者使蜀過陝特恣貪虐紳廉其不法狀數十奏之且請自今勲臣出使毋枉道 上命著爲令併徵忻城伯還忻城伯懼自殺秦地肅然初督學山東時有一二鄉宦求庇其不肖子弟不得則大恚已乃作爲謗書徧騰之兩都中當丙辰時撼之不動益慚憤至是屬京察期復以流言中之甚異調改南京紳曰吾矢勤于國而顧增茲多口命也遂歸

卧河山舊廬課子明經尋繹故業日與故友嘯咏杯酒間若未嘗涉世者以正德癸酉卒得年五十五耳訃聞予祭一壇階四品不滿一考于法未應賜祭蓋異數云

劉廷臣

劉廷臣字伯鄰號白石洪洞人嘉靖丁酉鄉舉第一人戊戌登進士第守裕州時天子由宛城如荆襄比歲不熟諸務蝟集供應不易或有謂且緩其行者曰當官避難非忠也遂卑賤之任不三日駕且到左右皆未識面時起倉卒舉措實難乃博選士著諳



事者十餘人指授規畫事乃就緒比 駕旋益有備  
于時諸守令多被罪奪職獨獲犒是歲秋 上命刑  
侍王公賑濟饑民咨以採荒之策其所條陳悉付施  
行全活甚衆裕民多居郭外城市寥寥請于兩臺徙  
鉅富者實之開創井闢以通貿易民甚便之清慎勤  
敏歷三載如一日遷刑部員外郎奉命畿甸錄囚殫  
竭精力緣事求情奏可矜原者八百餘人皆得 俞  
允自是聲望益重擢知開封府開封爲會城且孔道  
號爲難治摻剔弊端立法畫一諸宗藩悉斂不敢肆  
政事卓異不可枚舉民有活包家之謠庚戌入覲考

上最時湖南苗寇不靖遂陟辰沅兵備副使道出開  
封裕州百姓爭持牛酒謹呼於道至不能行在楚未  
幾以北虜猖獗牧馬南向擇異才移鎮重地乃改授  
天津嚴隄防明紀律拊瘡痍減供用久之山右妖民  
肆毒蔓延河間大名之間巡臺下捕治之令甚亟意  
以驟勦之玉石俱焚給執令者曰此地皆我良民焉  
有妖賊速除捕治之令衆莫測陰呼謹密幹辦者授  
以方略賊因令弛謀解竟擒殺之地方以寧壬子選  
試武舉蓄糧飭兵爲諸道最臺臣交薦其賢癸丑中  
川權師尚詔之亂移兵討平之夏轉河南叅政汝南

撫民招集逃亾賑貸饑寒不三月令肅化行尋陞右  
僉都御史巡撫宣府虜騎憑陵甚於諸鎮首請糧餉  
給其食亟修墩堡衛其居時復簡閱作其敵愾官軍  
莫不戮力用命甲寅虜犯北路防禦有功晉右副都  
御史乙卯九月虜大舉入寇由西路奔懷來與賊對  
壘由是不得南下夜遣勇士劫其營賊衆驚亂乃遁  
去乘勝追擊斬獲甚多捷聞 天子嘉悅有白金文  
綺之賜上谷日行宣鎮地方曠遠難以周知乃編上  
谷須知上谷圖說南山圖考地理險夷兵馬強弱糧  
儲多寡無不備載邊事孔棘神力勞瘁初力疾事事

久不能勝乞骸骨蒙 溫旨賜歸卒年五十有一

### 王崇古

王崇古字學甫號鑑川蒲州人嘉靖辛丑舉進士實出鄭端簡公門鄭負人倫鑒爲所器重悉以國朝掌故及戰守機宜指授之已奮然有自見之志矣授刑部主事歷員外郎中巨璫麥福縱下爲奸利繩之以法無少貸分宜中夏貴溪以危法獄具而獨不署名徐文貞亟稱之出爲汝寧太守伊藩驕恣置左右于法而歸其侵田大盜師尚詔蹂躪吳楚間諸郡震動設方略戮其魁數十人賊鋒爲挫晉副使飭兵常鎮

創海防條議率俞大猷等于海洋殲倭奴二百餘級  
晉按察使河南右布政擢右僉都御史巡撫寧夏上  
豫秋防六事虜寇清水營遣大將吳鼎擊走之又招  
降卜兒丈三百餘人虜徙榆林潰瓦渣梁殺大將親  
督勁兵往救之斬獲甚衆晉兵部右侍郎兼僉都御  
史總督三邊軍務二歲中虜凡三薄塞遣大帥董一  
奎趙苛等擊走之尋遣雷龍等出長城二百里至白  
城子搗其巢大破之會流賊郭孟振鈔掠秦晉勢張  
甚徵兩省兵平之凡斬首虜七百餘級鹵馬牛羊輜  
重一萬六千有奇晉右都御史改宣大山西總督時

俺答者虜酋之最雄黠者也而中國叛人趙全輩實傳翼之全居古豐州屋居佃作招亡命數萬號曰板升導虜入塞故邊庭無歲不中虜國家懸賞格得全等一人賞千金拜官都指揮會俺答愛孫把漢那吉者有所恨挾其妻比吉等叩關請降崇古喜曰虜事入吾彀中矣屬閫帥厚撫之疏請于上封把漢爲指揮使俺答偵知把漢所在大舉兵薄城下索馬堅壁清野坐困之而陰部署兵馬扼塞處相持數日虜稍稍引退卽縱兵尾擊之伏軍四面起虜腹背受敵一日七戰所殺虜過當虜氣大沮知不可以戰得把漢

矣乃使人來言曰天朝歸我孫者且欵塞然殊無意  
執全等乃盛陳兵出把漢視之則把漢者已易綬纓  
佩印綬帶金瑩然洋洋無歸意指謂虜使曰此儿上  
物也 聖天子寬之若此此不足購趙全等耶因遣  
將軍田世威等往諭意俺荅且感且泣願悉如命而  
請貢馬通市世世稱外藩力疏請于朝得 俞旨於  
是虜果執全等九人易把漢去旣獻俘 闕下 上  
降勅封俺荅爲順義王諸酋拜官有差崇古親詣弘  
賜堡宣 上威德定貢市則諸夷羅拜龍帷奉表稱  
謝貢馬五百有九歲以爲常其互市視宣大準事竣

穆皇帝大悅祭告郊廟御皇極殿宣表受賀自辛未迄于今邊鄙不聳完室家保首領省軍興費不貲功甚偉焉是年進太子少保兵部尚書在鎮五載以協理戎政召還明年加少保未幾告歸又十二年而卒享年七十有四訃聞詔贈太保謚襄毅予祭九壇遣中書舍人營葬廕子爲國子生三爲錦衣千戶一

楊俊民

楊俊民字伯章號本菴蒲州人襄毅公博之子也嘉靖庚戌進士授戶部主事值虜薄都城主廩餼繕城守分布賊有方略識者韙之尋調禮部員外郎中有



詔賜戚里黃門趨之宜給俊民曰此內賜也非禮官  
所得與宜於迎和門頒之上聞而是其言隆慶戊

辰督學河南刻二程全書置贍學田祀鄉先哲忠義  
節烈者士斌斌興起轉本省叅政時新鄭柄國鄢陵  
劉生者新鄭甥也傲不受課倍扶之除其名其兄大  
中丞揭有司請祀于鄉揭嘗有手刃一子惡其刻忍  
黜弗錄萬曆改元入爲太僕少卿丁父憂起補原官  
轉太常少卿戊寅轉大理尋擢僉都御史撫治鄖陽  
辛巳進副都御史移鎮山東壬午皇太子生廕一  
子入太學其年陞兵部右侍郎丁母憂起戶部右侍

郎督理漕河巡撫鳳陽凡三歷重鎮所至斥貪殘損徭賦實戶口詰兵戎諸所興除務計地方之便所不便者卽詔條日下一切停閣忤權勿顧也撫卽二年積羨八萬五千餘金適議罷卽撫預條善後七事防之東土閒田請輕其租聽民占墾期以數年易草萊爲沃壤丁亥改兵部左署部事會議虜王嗣封俊民言款未可遽罷惟內脩守備而外勒西虜使盡還巢申定市額使無溢索溢索而罷未晚也議遂決戊子壽宮成以督役勞陞正二品俸賜一品麒麟服己丑協理京營念營兵驕惰請選三大營備兵充總協標

下令足三千人以資彈壓報可是冬陞戶部尚書總督倉場未幾寧夏卒戕主帥叛勾虜直薄潼關朝廷發大兵討之輸將未半而朝鮮中倭患復發大師東矣當是時東西用兵各數百萬芻糗迫于星火前後徵調七年餉不足議增鹽筴議拜爵免罪議勸輸議借漕糧議轉山東粟補苴百方僅無乏絕而皇太子出講長公主婚仁聖太后喪兩宮災費皆不貲無一不仰給者甲午中州大侵人相食所發帑庾銀粟又數十萬九邊年例益詘而求增無已內庭非時之索若增取滇金及趣辦鋪宮珠寶等費復不貲且

冢宰缺則命攝銓御史大夫缺則命攝憲晨起入署  
諸曹郎以次稟畫裁決略盡退而題覆章疏占荅箋  
記筆不停揮盡酉而後出至不知有寒暑旣寢疾猶  
時驚起喀喀嚔語家人不甚解然要皆公朝事無一  
及于私者 上遣中使臨問賜以牢醴蔬餐復 溫  
旨慰諭之乃竟不起訃聞祭于九壇符卿營兆域人  
人護其喪歸加贈少保兼太子太傅

### 張四維

張四維字子維號鳳磐蒲州人嘉靖己酉舉山西第  
二癸丑成進士選庶吉士讀書中秘獨取累代典故

及四方興除利弊反覆研析華亭徐文貞雅以公輔期之越八年 莊皇帝改元以實錄大典成晉右春坊右中允充經筵日講官已遷諭德侍讀晉吏部右侍郎教習庶吉士萬曆乙亥晉禮部尚書兼東閣大學士入贊機務丁丑纂修 穆廟實錄成加太子太保累贈少師吏部尚書中極殿大學士前後廕子者四方江陵秉政法令苛急如束溫薪海內訕訕是年江陵急因密疏請下寬大 詔罷一切法令不便者其正首揆僅期月耳而當鼎革之會廣主澤厚元元芟儉壬舉遺佚凡舊爲江陵抑弃者循次拔用由是

公論大明中外清肅未幾以父憂歸里以乙酉冬疾卒訃聞諭祭十三壇遣官營葬官一子尚寶丞贈太師謚文毅

晉應槐

晉應槐字植吾號念冲洪洞人嘉靖丙辰進士授中書舍人擢吏部主事歷文選郎中條定選規按籍陞授無能輕重其間卽華亭相有所私亦不得也故事銓吏秩滿率自舉鄉人以代時同鄉有大司馬以其子請弗應比擢太常寺少卿則大司馬晉冢宰矣脩前卻謫運判稍遷廣平同知久之轉河南僉憲值河

北礦賊大開密遣一將率勇士二十人佯爲賈客深入賊壘用間擒其魁十餘人餘黨解散已遷河西固原備兵副使覈廩藏革影役稽糧籍清守支課鹽收簡將卒通牧地脩河堤一切利幣督若觀火丁內艱歸復除湖廣副使首按侵奪屯田者置之法刊屯約四章擢叅政分守湖北榮府承奉死于醜理官受賄幾脫免竟坐如法晉長楚臬景王府第以府僚羣飲燬于火而罪樵採者七人毅然起曰罪在官而以小民償之吾何忍竟釋七人罪抵其官歲當鄉試江陵相介學使者請其子笑曰不見翟相國之雙鳳鳴乎

休矣已而擢拜右僉都御史巡撫寧夏靈州將爲兇  
卒所殺邊庭震動以靜鎮之而以密計擒撲其首惡  
地方安堵未幾以楚事被彈章銓部議以原秩調用  
南京竟謝事去卜築于北溪居曰漁樵坊曰澹泊齋  
曰無思環清流周茂樹日手黃庭一編偃仰其間著  
漁樵莊說無思軒盟以自廣還鄉年僅五十優遊林  
下者二十五年七十有五而卒

覃應元

覃應元字德芳馬邑人母方姪夢神人持一果色正  
赤如柿芳香喫人授之曰以此爲而子彌月乃生登



嘉靖乙丑進士授歷城令歷城巖邑賦訟旁午至則  
應手輒辦時察民所疾苦孳孳務拯其急開田北山  
下因湖爲渠教民灌漑治東山塗徑之險仄者以便  
車馬至今賴之獨耻趨事上官撫臺某性剛愎用擊  
斷立威郡縣所具城旦書連者多斃杖下應元非重  
辟皆罷遣全活甚衆某檄縣徵贖金千閱籍僅數十  
金以報某大恚一日閤書私以書函金饋某適邑尉  
值庭下尉舉篋不勝書委而金見某慙咎尉數十託  
他事逐尉去尉創甚應元屬醫調護厚遺之某謂其  
背已而私尉也徧伺陰事無所得會奏最當徵召力

從中沮之乃遷南京刑部主事尋轉戶部員外調兵部車駕司郎中主郵傳符驗達官貴人求請無虛日悉按例謝絕之不少徇出守河南府府治居天下樞冠蓋四集時有禁不得用傳留滯益多而民益擾至則酌定經費客無停軌供億之累移教屬縣汰冗役禁株訟勸農與學闔郡不嚴而化妖民許天宮左道惑衆衆趨之懼其亂也設方略擒之亂止嵩山有銀礦民緣爲奸利椎埋擊殺有司莫敢問密遣捕盜八人易服入賊所別伏健卒於要地以待八人潛伺賊

縣崖間掩其不備擒之從間道出旣遠賊衆始

覺駭而潰散嵩洛之間以寧甲子遷四川副使分巡  
叙瀘諸郡境接獠夷民俗龐雜時獠婦某謀作亂帥  
劉訶知其狀請兵之應元曰獠所恃積聚耳第募健  
兒燔其巢此一卒之力豈足勤衆帥從之獠婦果寢  
其謀亡何移備兵延綏甃治神木鎮羗諸城堡以固  
封守開永清等處荒田以贍屯卒覈諸將領私役士  
以裁冗餉疆事犁然以飭已調備兵長沙盜駕舟出  
沒衡湘間卒不能捕益乘其勢顛越人于貨下令哨  
船皆建大旗其上哨卒以號衣爲識分番巡緝所往  
來停船處津吏署狀馳報卒不得逞盜乃息轉苑馬

寺卿分巡平涼值歲大稔牧卒坐馬死不能償逃者  
迴半而部使者下追補之令甚急應元曰馬與人孰  
其今乃欲驅生人償死馬乎屬各監暫寬督促急招  
無流亡部使者以非初指奏令致仕歸應元曰失一  
官而活數千人歸可矣驩然就道抵家未數月而卒

### 張夢鯉

張夢鯉字汝化號龍池蒲州人嘉靖丙辰進士歷兵  
部郎中擢開封知府至則首褫隸人不籍名者累百  
人晨起坐堂皇剖決立斷狡胥無所緣爲奸郡故饒  
財賦賦所有奇羨吏前白故事以佐公需怒笞之悉

附入歲會中邑令進贖鍰笑而却之曰乃公無用此  
爲也悉徙實庾廩有大盜譁于獄閫兵來赴援者匝  
牆外日暝睥睨不敢動手劒而入曰敢後者死衆擁  
入盜皆伏誅時新鄭方貴所示風旨藩臬大夫皆風  
靡有扶溝令爲新鄭黨所愬新鄭重怒待之乃力白  
其無他新鄭大不懌而卒無如之何然以治行卓異  
秩滿不遷久之備兵靖邊初邊議貢市文武吏多以  
不廉失虜心否者以漢財物啖虜恣縱之名曰羈縻  
比至立畫機宜卽以市椎充市賞不至費縣官一金  
事聞賜金有差而諸邊時方事虜顧虜至輒憂芻粟

悉摘發其乾沒者置於法邊庫悉清虜之盟也議者謂吾且以其暇脩守備乃盟日久備益日弛雖功令與斬首虜同功然多用虛文相冒無實者夢鯉所築鎮邊新障百二十里蓋至今稱雄邊起學宮親爲邊人師帥彬彬比於內地晉山西叅政治田賦條官會之議置積受輸諸轉置惟隸役任歲省富民數十萬計陞江西按察使取訟師詢得其主名數十人捕治之訟事衰息復陞山西布政使屬有鑄錢之役曰是不可急急則銅價騰踊條具八事絜爲令所鼓鑄文質周廓而錢法大行久之拜都御史巡撫順天再撫

甘肅順天外備邊內撫三輔悉裁抑諸不急費歲省  
征徭累十二萬已悉取積逋盡蠲之三輔民大蘇會  
虜炒蠻寇古北口遣裨將李如楨等擊破之獲首虜  
捷聞 詔賜白金文綺東虜土蠻以五萬騎犯遼部  
裨將楊粟等擊破之捷聞再賜白金文綺益爵一級  
以是威鎮諸虜間虜以十萬衆欲窺薊偵薊有備遂  
巡不敢入移攻遼又赴援遼再破之又再賜白金文  
綺而戚將軍繼光時爲大將守薊所與議兵間同異  
輒瞋目諍不下已而策果奇中將軍亦穆然心折也  
尋入爲大理寺正卿宣言廷尉與比部御史臺共執

法耳何知形迹論不當者輒反數月所計繫登中者  
千餘牘大辟囚以羅織下獄者全活甚衆時江陵相  
貴倨甚伉直無所詘江陵目攝之或謂宜遜謝奮衣  
起曰吾不能徒步勤造請若廷尉湯也遂謝病歸生  
平爲人嚴重孝友與人交無城府然非公事不一見  
縣大夫仕宦三十年無異寒素以萬曆丁酉卒年六  
十有五

邵光先

邵光先字子孝號文川長治人嘉靖己未進士令上  
海用治最徵拜御史按貴陽首發大中丞奸賊及豪



貢不法狀繼按楚窮治弱藩徒黨置之重辟諸宗欽  
手擢大理寺丞晉少卿尋晉右僉都御史巡撫延綏  
時虜求內附定貢議虜數要市賞劃爲定額錙銖不  
得溢予歲費大省已條奏善後四事乘暇繕邊垣一  
千五百里至今賴之移鎮陝西增置守將清理芻糧  
邊地肅然轉左副都御史協理院事丙子閱視薊遼  
保定邊務所上將吏殿最一準於工實晉兵部右侍  
郎廕一子國子生辛巳以母憂歸服除起原官總督  
如故以邊勞晉兵部尚書廕一子入太學丁亥晉太  
子少保前後在制府八年宣示恩威申嚴約束務以

大義折虜謀服其心而間出機權制其變故八年間東接金明西連張掖延袤數千里封守堅完吏民安堵無異時烽燔燧舉兵連不解之禍萬曆己丑在鎮聞父喪一慟輒僵不能起距生五十有七已耳訃聞詔贈太子太保予祭四壇命行人董葬事視常典有加焉

### 王家屏

王家屏字忠伯號對南山陰人其始生也祖石溪公方假寐夢有仙仗擁金童自雲中下覺而乃生有異質童時授書一再過輒成誦甫十三補邑學生成隆

慶戊辰進士選庶吉士授翰林院編修同纂修 世  
宗實錄辛未分校禮闈萬曆改元同修 穆宗實錄  
乙亥充經筵日講官雅擅經術善講解每進講禮度  
從容音節洪亮 上每改容聽之從洗馬晉宮詹歷  
陞翰林院侍讀學士掌院事尋教習庶吉士改吏部  
右侍郎乙酉以吏部左侍郎兼東閣大學士入內閣  
叅與機務與太倉王公錫爵同麻而拜五月召對煖  
閣偕同官議處章奏扈 駕視壽宮 賜織金飛魚  
羅金椰瓢諸物至大峪山召對幄次丙戌以風霾偕  
同官條上數事請寬杼柚減型器罷水田 上嘉納

之是歲以丁內艱歸當推閣臣上不允虛席以待  
比禫除手詔起禮部尚書兼東閣大學士遣行人卽  
其家召之以四月入朝踰時未得謁見值萬壽節乃  
上疏曰臣入京踰三月矣尚未獲一瞻天表奉玉音  
臣惟堂陛之交惟有朝講軍國之政惟有章疏今朝  
講久輟典禮並廢矣聖壽屆期捧表入賀者雲集尚  
可端居大內不一出乎章疏頻留綱紀漸弛矣皇  
儲虛位上書力請者鱗次尚可留疏禁中不蚤定乎  
臣願早臨朝寧無違祝聖之期畢發封章首下建儲  
之議上覽疏感動爲再御門始面恩上目屬久

庚寅元日召對毓德宮 上擁皇長子令閣臣諦

視諭以保愛之指請諭教 上領之疏請冊立不報

四月以災異上疏言今天鳴地震星隕風霾川竭湖  
涸之變疊見四方水旱癘疫交發累歲外患未休軍  
餉積缺邊腹並潰兵農俱困而議論紛紜罕持大體  
簿書詳致祇飾彌文綱維廢弛名實舛混徒蒿日刻  
心而不能效一臂亦安用臣爲哉用是自列罪狀冀  
賜罷歸奏入得 旨慰留再上疏曰 皇上靜攝之

旨屢形傳諭臣子之心豈能自安幸而 聖體康豫  
而不能朝夕獻替導主德于緝熙卽或 聖體違和

而不能左右調護保 聖躬于元吉此臣之夙夜憂

懼者一也 皇太子冲睿中外繫心國本莫定羣情

危疑此臣之夙夜憂懼者二也 堦庭深密之中侍從

僕御之事喜怒過當則 聖性累 和平訶責太嚴

則羣小震於摧壓此臣之夙夜憂懼者三也臣抱此

憂懼之衷兼遘災危之會揣循才力既不能有濟于

時積累精誠又無由感通于 上此臣所以內愧尸

素不能頃刻自安者疏入不報已乃以冊立事諸司

疏章累百 上益厭之一日文書官李浚口傳諭旨

如科道等衙門不來瀆擾便於明年冬傳旨冊立如

再來煩瀆直待十五歲冊立復上疏云臣復奉 諭  
旨竊幸元良之建斷自宸衷冊立之期振於來歲臣  
當喜色以歡傳諸臣亦卽當誦指而供俟矣第恐口  
傳天語宣布未周不如親發綸音播告尤速謹擬傳  
帖一道伏望裁發施行所有再來瀆擾直待十五歲  
之說容臣默示 聖意戒諭諸臣似未可入之傳帖  
遂擬帖附浚入奏度不得請卽令關門吏馳報禮科  
禮部浚出果傳旨云札子不必用而部科回話疏已  
上矣 上雖不懌然止奪部科俸而儲議遂決自是  
廷中無復言建儲者明年八月主事張有德以造辦

錢糧請 上震怒罪有德責輔臣附和改冊期遲三年已而侍郎黃鳳翔以忤旨放歸言官羅大紘鍾羽正等並以爭議冊期蒙譴科臣李獻可等又以請豫教降罰有差乃封還御批力請寬宥其疏云獻可等輕冒臣等何敢僭爲解釋但疏稱冊立之典可以少緩而待來年諭教之期不可少停而虛今日則其意乃在請諭教非請冊立也乞憫狂愚特從矜宥疏入未報會有申救獻可者皆獲譴復上疏曰頃科臣李獻可等降罰之旨臣不揣封還揭請未久而諸臣申救者又已得罪兩日之內嚴旨疊出奪俸謫官投荒



削籍甚之廷杖雷霆橫擊風日淒陰原其纍端則自  
臣揭救獻可始是臣惜諤諤之一士而反累濟濟之  
羣英爭降罰之輕刑而反構放逐之重譴也望 皇  
上將臣特賜罷免以示首事之愆仍召還降謫諸臣  
以釋株連之累不報又上疏云臣遭遇 聖明具員  
輔弼旣不能婉導密視防君志未萌之欲又不能明  
諍顯諫扶乾綱將壞之樞曠職鰥官久當退避所以  
逡巡未去徒以被恩高厚毫髮靡酬庶幾殫竭愚忠  
漸次匡正乃今數月之間請朝講不報請廟饗不報  
請元旦受賀不報請大計臨朝不報犬馬微誠不能

感回天意已具見於此矣至於升儲大典九廟之神  
靈共屬萬方之想望惟殷冊立之期或可少待而豫  
教之舉委宜蚤圖科臣所言未爲差謬譴呵一出遠  
近驚疑使道路之猜議橫生宮闈之讒構交作循省  
虛庸終慙匡救若復依違保祿渙忍苟容死且有餘  
戮焉願亟賜罷歸俾全晚節辭愈直切 上溫旨慰  
留復上疏曰伏荷天言切諭謂沽名逸卧大非人臣  
之義所宜且念贊襄有年當以幾務之艱爲慮華袞  
鈇鉞總屬皇恩雨露雪霜何非至教惟是孤忠獨立  
之身抱下愚不移之疾俯循深痼恐非數日之假可

痊望乞生全寔以一朝之褫爲幸上不報至三月延  
試辭免讀卷官賜玦之命始下疏辭有云情依依而  
戀主頻回弃婦之頭心惓惓以憂時橫灑孤臣之涕  
至辛丑東朝遂建聞之喜甚曰聖主如天四時寒燠  
自有節序老臣慙矣爲齋沐表賀上遣行人持羊  
酒銀幣存問官其子湛初爲中書舍人癸卯病夢與  
馬文莊詠獻芹曝詩覺能舉其句及病甚籙語皆公  
家事也訃聞謚文端

### 趙三聘

趙三聘字天民號任齋河津人生而韶秀童時里胥

攝更夫者闕于門諸兄走匿聘獨往見令婉變盤辟  
容止甚都令奇其狀試以文立奏詫曰異才也賜之  
筆札而厚遣之更夫事得解年十四補邑諸生登隆  
慶戊辰進士授益都令改江都丁母憂回起補獻縣  
凡三領縣皆麗郡冠蓋如雲簿書山委出則戴星入  
則設燎窮日夜之力應之館無留賓案先宿牘嘗衆  
謁上官問及鄰邑疑獄令噤不能對聘代對之甚悉  
上官偉其材凡旁近縣獄無不移以論報者前後疏  
薦十九能聲日益上聞而勞亦日積寢病咯血矣聘  
之爲令也其大指在拊循百姓振救其菑害而不爲

苛瑣江都苦徭賦力行條鞭法民便之獻縣苦河溢  
爲隗源導委俾水有所歸民無墊溺中州苦盜行保  
甲法什伍相伺盜以日衰擢守禹州六年寬于御民  
嚴于操下墨吏猾胥銖兩之奸不少貸檢故府圖籍  
編次州志以備信史入拜司農郎值鑾輿謁山陵中  
貴人騎而從者部當宿芻藁以待畫地爲域按次給  
之迄事無譁者監九門鹽法日與大璫共事儼然以  
正臨之諸胥隸蝨蠹其中者撻剔殆盡監餉遼左帑  
金漕粟應手輒發曾不淹時士氣倍厲廣寧北有牽  
馬嶺道迫陘騎過必下或議開之以便乘障聘曰此

一綫之路正以限虜開之不虞延虜以入乎後虜果從其地內犯衆乃服其識以功贈金者三增秩俸者一已丑擢四川副使備兵川東會其子已成進士官檢討喜自慰曰吾乃今可以休矣遂移疾歸歸而構閒閒亭于郊園携賓友觴咏其中條然適也享年六十有五而卒

衛瑛

衛瑛平陽洪洞人擢鄉進士謁選真定通判平易循雅事無專成人未之奇也兩遷至開封知府銳意修政務在全安小民始得其所開封爲東南要衝且在

省下賓客車從輻輳百事填委瑛旣視事一切不急  
之費獨省十五六民咸便之撫按官或有所下令度  
不可常行卽入具白狀從容陳說故上司初以爲難  
直久始諒其忠信不妄也當是時天下郡縣爭爲媚  
調所在張飾輿馬伏謁道傍唯諾必謹百姓利病率  
不爲陳甚至匿水旱不以聞惟恐失名譽其苞苴暮  
夜益潰濫不可言瑛獨以平正自持直而不挺謹災  
告窮用紓民力或有所忤謫譴時至輒徐然曰吾以  
惠人爲本耳寧卹其他乎由是上下咸稱其賢治行  
爲天下最然終以無援竟不得遷居開封九年以河

南叅政致仕。珉在官不以妻子自隨。歲所支俸錢皆付庫吏掌籍衣服車馬非敝不更造。至今汴民猶誣思之。

補遺

王矩

王矩平陽府人。景泰中知辰州府。剛方有守。正直不阿。盡心民事而尤拳拳于學校。病劇有私饋之金者。矩曰。吾平生無私。至此改節豈全歸乎。得正而斃。吾願畢矣。比卒。笥貯圖書數卷。此外無長物也。士民走吊哭奠者如市。至今人尚稱述之。



劉翀

劉翀字文翔山西平陸縣人正德六年進士由行人  
選四川道御史清軍山東巡按陝西刷卷京畿嘉靖  
初以加 獻帝徽號抗疏陳諫廷杖致仕

王佐

王佐垣曲人正德中知西平縣會賊猝至佐乃嚴備  
禦日夜視城與僚屬誓以死守旣而城陷佐帥衆猶  
巷戰力盡被害事 聞贈光祿少卿 命有司立祠  
祀之仍廕一子入監